

陳書

卷一之七

3246

Vertical text on the left side of the page, possibly a title or list of items.



陳書三

十
卯
季

上海民國第

一圖書局印

陳書序

陳書大本紀三十列傳凡三十六篇唐散騎常侍姚思廉撰始思廉父察梁陳之史官也錄二代之事未就而陳亡隋文帝見察甚重之每就察訪梁陳故事察因以所論載每一篇成輒奏之而文帝亦遺虞世基就察求其書又未就而察死察之將死屬思廉以繼其業唐興武德五年高祖以自魏以來二百餘歲世統數更史事放逸乃詔撰次而思廉遂受詔爲陳書久之猶不就貞觀三年遂詔論撰於祕書內省十年正月壬子始上之觀察等之爲此書歷三世傳父子更數十歲而後乃成蓋其難如此然及其既成與宋魏梁齊等書世亦傳之者少故學者於其行事之迹亦罕得而詳也而其書亦以罕傳則自祕府所藏往往脫誤嘉祐六年八月始詔校讐使可鏤板行之天下而臣等言梁陳等書缺獨館閣所藏恐不足以定著願詔京師及州縣藏書之家使悉上之先皇帝爲下其事至七年冬稍稍始集臣等以相校至八年七月陳書三十六篇者始校定可傳之學者其疑者亦不敢損益特各疏于篇末其書舊無目列傳名氏多闕謬因別爲目錄一篇使覽者得詳焉夫陳之爲陳蓋偷爲一切之計非有先王經紀禮義風化之美制治之法可章示後世然而兼權尙計明於任使恭儉愛人則其始之所以興惑於邪臣溺於孽妻忘患縱欲則其終之所以亡興亡之端莫非自己致者至於有所因造以爲號令威刑職官州郡之制雖其事

已淺然亦各施於一時皆學者之所不可不考也而當時之士自爭奪詐僞苟得偷合之徒尙不得列以爲世戒而況於壞亂之中蒼皇之際士之安貧樂義取舍就不爲患禍勢利動其心者亦不絕於其間若此人者可謂篤於善矣蓋古人之所思見而不可得風雨之詩所爲作者也安可使之泯泯不少概見於天下哉則陳之史其可廢乎蓋此書成之既難其後又久不顯及宋興已百年古文遺事靡不畢講而始得盛行於天下列於學者其傳之之難又如此豈非遭遇固自有時也哉臣恂臣穆臣藻臣覺臣彥若臣洙臣鞏謹敘目錄昧死上

原

任

詹

事臣陳浩

洗

馬臣陸宗楷

編

修臣孫人龍

貢

生臣曾尚渭

貢

生臣王積光

奉

勅恭校刊

陳書目錄

唐 散 騎 常 侍 姚 思 廉 撰

本紀六卷

列傳三十卷 凡三十六卷

本紀

陳書卷一

本紀第一

高祖上 姓陳氏諱霸先

陳書卷二

本紀第二

高祖下

陳書卷三

本紀第三

乾隆四年校刊 陳書目錄

世祖 諱禔

陳書卷四

本紀第四

廢帝 諱伯宗

陳書卷五

本紀第五

宣帝 諱瑱

陳書卷六

本紀第六

後主 諱叔寶

列傳

陳書卷七

列傳第一

皇后

高祖章皇后

世祖沈皇后

廢帝王皇后

高宗柳皇后

後主沈皇后 張貴妃

陳書卷八

列傳第二

杜僧明

周文育 子寶安

侯安都

陳書卷九

列傳第三

侯瑱

歐陽頎 子紇

吳明徹 裴子胤

陳書卷十

列傳第四

周鐵虎

程靈洗 子文季

陳書卷十一

乾隆四年校刊

陳書目錄

列傳第五

黃法甌

淳于量

章昭達

陳書卷十二

列傳第六

胡穎

徐度 子敬成

杜稜

沈恪

陳書卷十三

列傳第七

徐世譜

魯悉達

周敷

荀朗 子法尚

周景

陳書卷十四

列傳第八

衡陽獻王昌

南康愍王曇朗 子方泰 方慶

陳書卷十五

列傳第九

宗室

陳擬

陳詳

陳慧紀

陳書卷十六

列傳第十

趙知禮

蔡景歷

劉師知

謝岐

陳書卷十七

列傳第十一

王冲

王通弟勸

袁敬兄子樞

陳書卷十八

列傳第十二

沈眾

袁泌

劉仲威

陸山才

王質

韋載族弟翽

陳書卷十九

乾隆四年校刊

陳書目錄

三

列傳第十三

沈炯

虞荔 弟寄

馬樞

陳書卷二十

列傳第十四

到仲舉

韓子高

華皎

陳書卷二十一

列傳第十五

謝哲

蕭乾

謝嘏

張種

王固

孔奐

蕭允 弟引

陳書卷二十二

列傳第十六

陸子隆

錢道戢

駱牙

陳書卷二十三

列傳第十七

沈君理

王瑒

陸縉

陳書卷二十四

列傳第十八

周弘正

弟弘直
弘直子確

袁憲

陳書卷二十五

列傳第十九

裴忌

孫瑒

陳書卷二十六

列傳第二十

徐陵

子儉
弟孝克 份 儀

陳書卷二十七

列傳第二十一

乾隆四年校刊

陳書目錄

江總

姚察

陳書卷二十八

列傳第二十二

世祖九王

始興王伯茂

鄱陽王伯山

晉安王伯恭

衡陽王伯信

廬陵王伯仁

江夏王伯義

武陵王伯禮

永陽王伯智

桂陽王伯謀

高宗二十九王

豫章王叔英

長沙王叔堅

建安王叔卿

宜都王叔明

河東王叔獻

新蔡王叔齊

晉熙王叔文

淮南王叔彪

始興王叔重

尋陽王叔儼

岳陽王叔慎

義陽王叔達

巴山王叔雄

武昌王叔虞

湘東王叔平

臨賀王叔敖

陽山王叔宣

西陽王叔穆

南安王叔儉

南郡王叔澄

沅陵王叔興

岳山王叔韶

新興王叔純

巴東王叔謨

臨海王叔顯

新會王叔坦

新寧王叔隆

新昌王叔榮

太原王叔匡

後主諸子

皇太子深

吳興王曄

南平王嶷

永嘉王彥

南海王處

信義王祗

邵陵王兢

會稽王莊

東陽王恂

吳郡王濬

錢唐王恬

陳書卷二十九

列傳第二十三

宗元饒

司馬申

毛喜

蔡徵

陳書卷三十

列傳第二十四

蕭濟

陸瓊子從典

顧野王

傅縡章華

陳書卷三十一

列傳第二十五

蕭摩訶子世廉

任忠

樊毅弟猛

魯廣達

乾隆四年校刊

陳書目錄

陳書卷三十二

列傳第二十六

孝行

殷不害 弟不佞

謝貞

司馬嵩

張昭

陳書卷三十三

列傳第二十七

儒林

沈文阿

沈洙

戚衮

灼 張嶷
鄭 沈德威
陸詡
賀德基

全緩

張譏

顧越

沈不害

王元規

陳書卷三十四

列傳第二十八

文學

杜之偉

顏晃

江德藻

庾持

許亨

褚玠

岑之敬

陸瑋弟瑜 瑜從父兄玠
從父弟琛

何之元

徐伯陽

張正見

蔡凝

阮卓

陳書卷三十五

列傳第二十九

熊曇朗

周迪

留異

陳寶應

陳書卷三十六

列傳第三十

始興王叔陵

新安王伯固

陳書目錄

唐 散 騎 常 侍 姚 思 廉 撰

本紀第一

高祖上

高祖武皇帝諱霸先字興國小字法生吳興長城下若里人漢太丘長陳寔之後也世居潁川寔玄孫準
晉太尉準生匡匡生達永嘉南遷爲丞相掾歷太子洗馬出爲長城令悅其山水遂家焉嘗謂所親曰此
地山川秀麗當有王者興二百年後我子孫必鍾斯運達生康復爲丞相掾咸和中土斷故爲長城人康
生盱眙太守英英生尚書郎公弼公弼生步兵校尉鼎鼎生散騎侍郎高高生懷安令詠詠生安成太守
猛猛生太常卿道巨道巨生皇考文讚高祖以梁天監二年癸未歲生少俶儻有大志不治生產旣長讀
兵書多武藝明達果斷爲當時所推服身長七尺五寸日角龍顏垂手過膝嘗遊義興館於許氏夜夢天
開數丈有四人朱衣捧日而至令高祖開口納焉及覺腹中猶熱高祖心獨負之大同初新喻侯蕭暎爲
吳興太守甚重高祖嘗目高祖謂僚佐曰此人方將遠大及暎爲廣州刺史高祖爲中直兵叅軍隨府之
鎮暎令高祖招集士馬衆至千人仍命高祖監宋隆郡所部安化二縣元不賓高祖討平之尋監西江督

護高要郡守先是武林侯蕭諮爲交州刺史以哀刻失衆心土人李賁連結數州豪傑同時反臺遣高州刺史孫罔新州刺史盧子雄將兵擊之罔等不時進皆於廣州伏誅子雄弟子略與罔子姪及其主帥杜天合杜僧明共舉兵執南江督護沈顛進寇廣州晝夜苦攻州中震恐高祖率精兵三千卷甲兼行以救之頻戰屢捷天合中流矢死賊衆大潰僧明遂降梁武帝深歎異焉授直閣將軍封新安子邑三百戶仍遣畫工圖高祖容貌而觀之其年冬蕭暎卒明年高祖送喪還都至大庾嶺會有詔高祖爲交州司馬領武平太守與刺史楊暕南討高祖益招勇敢器械精利暎喜曰能尅賊者必陳司武也委以經略高祖與衆軍發自番禺是時蕭勃爲定州刺史於西江相會勃知軍士憚遠役陰購誘之因詭說暎暎集諸將問計高祖對曰交趾叛渙罪由宗室遂使僭亂數州彌歷年稔定州復欲昧利目前不顧大計節下奉辭伐罪故當生死以之豈可畏憚宗室輕於國憲今若奪人沮衆何必交州討賊問罪之師卽回有所指矣於是勒兵鼓行而進十一年六月軍至交州賁衆數萬於蘇歷江口立城柵以拒官軍暎推高祖爲前鋒所向摧陷賁走典徹湖於屈獠界立砦大造船艦充塞湖中衆軍憚之頓湖口不敢進高祖謂諸將曰我師已老將士疲勞歷歲相持恐非良計且孤軍無援入人心腹若一戰不捷豈望生全今藉其屢奔人情未固夷獠烏合易爲摧殄正當共出百死決力取之無故停留時事去矣諸將皆默然莫有應者是夜江水

暴起七丈注湖中奔流迅激高祖勒所部兵乘流先進衆軍鼓譟俱前賊衆大潰竄入屈獫洞中屈獫斬賁傳首京師是歲太清元年也賁兄天寶遁入九真與劫帥李紹隆收餘兵二萬殺德州刺史陳文戒進圍愛州高祖仍率衆討平之除振遠將軍西江督護高要太守督七郡諸軍事二年冬侯景寇京師高祖將率兵赴援廣州刺史元景仲陰有異志將圖高祖高祖知其計與成州刺史王懷明行臺選郎殷外臣等密議戒嚴三年七月集義兵於南海馳檄以討景仲景仲窮感縊于閣下高祖迎蕭勃鎮廣州是時臨賀內史歐陽頎監衡州蘭裕蘭京禮扇誘始興等十郡共舉兵攻頎頎請援於勃勃令高祖率衆救之悉擒裕等仍監始興郡十一月高祖遣杜僧明胡穎將二千人頓于嶺上并厚結始興豪傑同謀義舉侯安都張偃等率千餘人來附蕭勃聞之遣鍾休悅說高祖曰侯景驕雄天下無敵前者援軍十萬士馬精彊然而莫敢當鋒遂令羯賊得志君以區區之衆將何所之如聞嶺北王侯又皆鼎沸河東桂陽相次屠戮邵陵開建親尋干戈李遷仕許身當陽便奪馬仗以君疎外詎可暗投未若且住始興遙張聲勢保此太山自求多福高祖泣謂休悅曰僕本庸虛蒙國成造往聞侯景渡江卽欲赴援遭值元蘭梗我中道今京都覆沒主上蒙塵君辱臣死誰敢愛命君侯體則皇枝任重方岳不能摧鋒萬里雪此冤痛見遣一軍猶賢乎已乃降後旨使人慨然僕行計決矣憑爲披述乃遣使聞道往江陵稟承軍期節度時蔡路養起

兵據南康勃遣腹心譚世遠爲曲江令與路養相結同遏義軍大寶元年正月高祖發自始興次大庾嶺路養出軍頓南野依山水立四城以拒高祖高祖與戰大破之路養脫身竄走高祖進頓南康湘東王承制授高祖員外散騎常侍持節明威將軍交州刺史改封南野縣伯六月高祖修崎頭古城徙居焉高州刺史李遷任據大臯遣主帥杜平虜率千人入贛石魚梁高祖命周文育將兵擊走之遷任奔寧都承制授高祖通直散騎常侍使持節信威將軍豫州刺史領豫章內史改封長城縣侯尋授散騎常侍使持節都督六郡諸軍事軍師將軍南江州刺史餘如故時寧都人劉藹等資遷任舟艦兵仗將襲南康高祖遣杜僧明等率二萬人據白口築城以禦之遷任亦立城以相對二年三月僧明等攻拔其城生擒遷任送南康高祖斬之承制命高祖進兵定江州仍授江州刺史餘如故六月高祖發自南康南康贛石舊有二十四灘灘多巨石行旅者以爲難高祖之發也水暴起數丈三百里間巨石皆沒進軍頓西昌有龍見于水濱高五丈許五采鮮耀軍民觀者數萬人是時承制遣征東將軍王僧辯督衆軍討侯景八月僧辯軍次溢城高祖率杜僧明等衆軍及南川豪帥合三萬人將會焉時西軍乏食高祖先貯軍糧五十萬石至是分三十萬以資之仍頓巴巳會侯景廢簡文帝立豫章嗣王棟高祖遣兼長史沈袞奉表於江陵勸進十一月承制授高祖使持節都督會稽東陽新安臨海永嘉五郡諸軍事平東將軍東揚州刺史領會稽

太守豫章內史餘並如故三年正月高祖率甲士三萬人驅弩五千張舟艦二千乘發自豫章二月次桑落洲遣中記室參軍江元禮以事表江陵承制加高祖鼓吹一部是時僧辯已發潁城會高祖於白茅灣乃登岸結壇刑牲盟約進軍次蕪湖侯景城主張黑棄城走三月高祖與諸軍進尅姑孰仍次蔡洲侯景登石頭城觀望形勢意甚不悅謂左右曰此軍上有紫氣不易可當乃以舩舫貯石沉塞淮口緣淮作城自石頭迄青溪十餘里中樓雉相接諸將未有所決僧辯遣杜勣問計於高祖高祖曰前柳仲禮數十萬兵隔水而坐韋粲之在青溪竟不渡岸賊乃登高望之表裏俱盡肆其凶虐覆我王師今圍石頭須渡北岸諸將若不能當鋒請先往立柵高祖卽於石頭城西橫隴築柵衆軍次連八城直出東北賊恐西州路斷亦於東北果林作五城以遏大路景率衆萬餘人鐵騎八百餘匹結陣而進高祖曰軍志有之善用兵者如常山之蛇首尾相應今我師旣衆賊徒甚寡應分賊兵勢以弱制彊何故聚其鋒銳令必死於我乃命諸將分處置兵賊直衝王僧志僧志小縮高祖遣徐度領弩手二千橫截其後賊乃却高祖與王琳杜龕等以鐵騎悉力乘之賊退據其柵景儀同盧輝略開石頭北門來降盪主戴冕曹宣等攻拔果林一城衆軍又剋其四城賊復遭殊死戰又盡奪所得城柵高祖大怒親率攻之士卒騰柵而入賊復散走景與百餘騎棄稍執刀左右衝陣陣不動景衆大潰逐北至西明門景至闕下不敢入臺遣腹心取其二子而

遁高祖率衆出廣陵應接會景將郭元建奔齊高祖納其部曲三千人而還僧辯敗高祖鎮京口五月齊遣辛術圍巖超達於秦郡高祖命徐度領兵助其固守齊衆七萬填壘起土山穿地道攻之甚急高祖乃自率萬人解其圍縱兵四面擊齊軍弓弩亂發齊平秦王中流矢死斬首數百級齊人收兵而退高祖振旅南歸遣記室參軍劉本仁獻捷於江陵七月廣陵僑民朱盛張象潛結兵襲齊刺史溫仲豈遣使來告高祖率衆濟江以應之會齊人來聘求割廣陵之地王僧辯許焉仍報高祖高祖於是引軍還南徐州江北人隨軍而南者萬餘口承制授高祖使持節散騎常侍都督南徐州諸軍事征北大將軍開府儀同三司南徐州刺史餘並如故及王僧辯率衆征陸納於湘州承制命高祖代鎮揚州十一月湘東王卽位於江陵改大寶三年爲承聖元年湘州平高祖旋鎮京口三年三月進高祖位司空餘如故十一月西魏攻陷江陵高祖與王僧辯等進敗江州請晉安王以太宰承制又遣長史謝哲奉牋勸進十二月晉安王至自尋陽入居朝堂給高祖班劍二十人四年五月齊送貞陽侯淵明還主社稷王僧辯納之卽位改元曰天成以晉安王爲皇太子初齊之請納貞陽也高祖以爲不可遣使詣僧辯苦爭之往返數四僧辯竟不從高祖居常憤歎密謂所親曰武皇雖磐石之宗遠布四海至於尅雪讎恥寧濟艱難唯孝元而已功業茂盛前代未聞我與王公俱受重寄語未絕音聲猶在耳豈期一旦便有異圖嗣主高祖之孫元皇之子

海內屬目天下宅心竟有何辜坐致廢黜遠求夷狄假立非次觀其此情亦可知矣乃密具袍數千領及錦綵金銀以爲賞賜之具九月壬寅高祖召徐度侯安都周文育等謀之仍部列將士分賞金帛水陸俱進是夜發南徐州討王僧辯甲辰高祖步軍至石頭前遣勇士自城北踰入時僧辯方視事外白有兵俄而兵自內出僧辯遽走與其第三子頗相遇俱出閣左右尙數十人苦戰高祖大兵尋至僧辯眾寡不敵走登城南門樓高祖因風縱火僧辯窮迫乃就擒是夜縊僧辯及頗丙午貞陽侯遜位百僚奉晉安王上表勸進十月己酉晉安王卽位改承聖四年爲紹泰元年壬子詔授高祖侍中大都督中外諸軍事車騎將軍揚南徐二州刺史持節司空班劍鼓吹並如故仍詔高祖甲仗百人出入殿省震州刺史杜龕據吳興與義興太守韋載同舉兵反高祖命周文育率眾攻載於義興龕遣其從弟北叟將兵拒戰北叟敗歸義興辛未高祖表自東討留高州刺史侯安都石州刺史杜稜宿衛臺省甲戌軍至義興丙子拔其水柵秦州刺史徐嗣徽據其城以入齊又要南豫州刺史任約共舉兵應龕載齊人資其兵食嗣徽等以京師空虛率精兵五千奄至闕下侯安都領驍勇五百人出戰嗣徽等退據石頭丁丑載及北叟來降高祖撫而釋之以嗣徽寇逼卷甲還都命周文育進討杜龕十一月己卯齊遣兵五千濟渡據姑孰高祖命合州刺史徐度於冶城寺立柵南抵淮渚齊又遣安州刺史翟子崇楚州刺史劉仕榮淮州刺史柳達摩領兵

萬人於胡墅渡米粟三萬石馬千匹入於石頭癸未高祖遣侯安都領水軍夜襲胡墅燒齊船千餘艘周鐵虎率舟師斷齊運輸擒其北徐州刺史張頌州獲運舫米數千石仍遣韋載於大航築城使杜稜據守齊人又於倉門水南立二柵以拒官軍甲辰嗣徽等攻冶城柵高祖領鐵騎精甲出自西明門襲擊之賊衆大潰嗣徽留柳達摩等守城自率親屬腹心往南州采石以迎齊援十二月癸丑高祖遣侯安都領舟師襲嗣徽家口於秦州俘獲數百人官軍連艦塞淮口斷賊水路先是太白自十一月丙戌不見乙卯出於東方丙辰高祖盡命衆軍分部甲卒對冶城立航渡兵攻其水南二柵柳達摩等渡淮置陣高祖督兵疾戰縱火燒柵煙塵漲天賊潰爭舟相排擠溺死者以千數時百姓夾淮觀戰呼聲震天地軍士乘勝無不一當百盡收其船艦賊軍懾氣是日嗣徽約等領齊兵水步萬餘人還據石頭高祖遣兵往江寧據要險以斷賊路賊水步不敢進頓江寧浦口高祖遣侯安都領水軍襲破之嗣徽等乘單舸脫走盡收其軍資器械己未官軍四面攻城自辰訖酉得其東北小城及夜兵不解庚申達摩遣使侯子欽劉仕榮等詣高祖請和高祖許之乃於城門外刑牲盟約其將士部曲一無所問恣其南北辛酉高祖出石頭南門陳兵數萬送齊人歸北者壬戌齊和州長史烏丸達自南州奔還歷陽江寧令陳嗣黃門侍郎曹朗據姑孰反高祖命侯安都徐度等討平之斬首數千級聚爲京觀石頭采石南州悉平收獲馬仗船米不可勝計

是月杜龕以城降二年正月癸未誅杜龕於吳興龕從弟北叟司馬沈孝敦並賜死二月庚申高祖遣侯安都周鐵虎率舸艦備江州仍頓梁山起柵甲子敕司空有軍旅之事可騎馬出入城內戊辰前監遠石城外兵參軍王位於石頭沙際獲玉璽四紐高祖表以送臺三月戊戌齊遣水軍儀同蕭軌軍狄伏連堯難宗東方老侍中裴英起東廣州刺史獨孤辟惡洛州刺史李希光并任約徐嗣徽等率衆十萬出柵口向梁山帳內盪主黃叢逆擊敗之燒其前軍船艦齊頓軍保蕪湖高祖遣定州刺史沈泰吳郡太守裴忌就侯安都共據梁山以禦之自去冬至是甘露頻降於鍾山梅崗南澗及京口江盜縣境或至三數升大如奕碁子高祖表以獻臺四月丁巳高祖詣梁山軍巡撫五月甲申齊兵發自蕪湖丙申至秣陵故治高祖遣周文育屯方山徐度頓馬牧杜稜頓大航南己亥高祖率宗室王侯及朝臣將帥於大司馬門外白虎闕下刑牲告天以齊人背約發言慷慨涕泗交流同盟皆莫能仰視士卒觀者益奮辛丑齊軍於秣陵故縣跨淮立橋柵引渡兵馬其夜至方山侯安都周文育徐度等各引還京師癸卯齊兵自方山進及兒塘游騎至臺周文育侯安都頓白土崗旗鼓相望都邑震駭高祖潛撤精卒三千配沈泰渡江襲齊行臺趙彥琛於瓜步獲舟艦百餘艘陳粟萬斛卽日天子總羽林禁兵頓于長樂寺六月甲辰齊兵潛至鍾山龍尾丁未進至莫府山高祖遣錢明領水軍出江乘要擊齊人糧運盡獲其船米齊軍於是大餒殺馬

驢而食之庚戌齊軍踰鍾山高祖衆軍分頓樂遊苑東及覆舟山北斷其衝要壬子齊軍至玄武湖西北莫府山南將據北郊壇衆軍自覆舟東移頓郊壇北與齊人相對其夜大雨震電暴風拔水平地水丈餘齊軍晝夜坐立泥中懸鬲以饜而臺中及潮溝北水退路燥官軍每得番易甲寅少霽高祖命衆軍秣馬尊食通明攻之乙卯旦自率帳內麾下出莫府山南吳明徹沈泰等衆軍首尾齊舉縱兵大戰侯安都自白下引兵橫出其後齊師大潰斬獲數千人相蹂藉而死者不可勝計生執徐嗣徽及其弟嗣宗斬之以徇追奔至於臨沂其江乘攝山鍾山等諸軍相次克捷虜蕭軌東方老王敬寶李希光裴英起等將帥凡四十六人其軍士得竄至江者縛荻筏以濟中江而溺流屍至京口鬻水彌岸丁巳衆軍出南州燒賊舟艦己未斬劉歸義徐嗣彥傅野猪於建康市是日解嚴庚申蕭軌東方老王敬寶李希光裴英起皆伏誅高祖表解南徐州以授侯安都七月丙子詔授高祖中書監司徒揚州刺史進爵爲公增邑并前五千戶侍中使持節都督中外諸軍事將軍尙書令班劍鼓吹甲仗並如故并給油幢卓輪車是月侯瑱以江州入附遣侯安都鎮上流定南中諸郡八月癸卯太府卿何歆新州刺史華志各上玉璽一高祖表以送臺詔歸之高祖是日詔高祖食安吉武康二縣合五千戶九月壬寅改年曰太平元年進高祖位丞相錄尙書事鎮衛大將軍改刺史爲牧進封義興郡公侍中司徒都督班劍鼓吹甲仗卓輪車並如故丁未中散

大夫王彭牋稱今月五日平旦於御路見龍跡自大社至象闕亘三四里庚申詔追贈高祖考侍中光祿大夫加金章紫綬封義興郡公諡曰恭十月甲戌敕丞相自今入問訊可施別榻以近辰坐二年正月壬寅天子朝萬國於太極東堂加高祖班劍十人并前三十人餘如故丁未詔贈高祖兄道談散騎常侍使持節平北將軍南兖州刺史長城縣公諡曰昭烈弟休光侍中使持節驃騎將軍南徐州刺史武康縣侯諡曰忠壯食邑各二千戶甲寅遣兼侍中謁者僕射陸績策拜長城縣夫人章氏爲義興國夫人丁卯詔贈高祖侍中太常卿諡曰孝追封高祖祖母許氏吳郡嘉興縣君諡曰敬妣張氏義興國太夫人諡曰宣二月庚午蕭勃舉兵自廣州度嶺頓南康遣其將歐陽頎傅泰及其子孜爲前軍至於豫章分屯要險南江州刺史余孝頃起兵應勃高祖命周文育侯安都率衆討平之八月甲午進高祖位大傅加黃鉞劍履上殿入朝不趨贊拜不名并給羽葆鼓吹一部其侍中都督錄尚書鎮衛大將軍揚州牧義興郡公班劍甲仗油幢阜輪車並如故丙申加高祖前後部羽葆鼓吹是時湘州刺史王琳擁兵不應命高祖遣周文育侯安都率衆討之九月辛丑詔曰肇昔元胎剖判太素氤氳崇建人皇必憑洪宰故賢哲之后牧伯征於四方神武之君大監治乎萬國又有一匡九合渠門之賜以隆戮帶圍溫行宮之寵斯茂時危所以貞固運泰所以光熙斯乃千載同風百王不刊之道也太傅義興公允文允武迺聖迺神固天生德康濟

黔首昔在休期早隆朝寄遠踰滄海大拯交越皇運不造書契未聞中國其亡兵凶總至哀哀噓類譬彼窮牢悠悠上天莫云斯極否終則泰元輔應期救此將崩援茲已溺乘舟履輦架險浮深經略中途畢殲羣醜泊乎石頭姑孰流髓履腸一朝指搗六合清晏是用光昭下武翼亮中都雪三后之勃讎夷三靈之巨厲堯台禹佐未始能階殷相周師固非云擬重之以屯剝餘象荆楚大崩天地無心乘輿委御五胡薦食競謀諸夏八方基跖莫有匡救疆臣放命黜我冲人顧影於荼孺之魂甘心於寧卿之辱却按下聿求哀之略莫從竊鉄逃責容身之地無所公神兵奄至不日清澄惟是辱蒙再膺天錄斯又巍巍蕩蕩無德而稱焉加以仗茲忠義屠彼妖逆震部夷氛稽山罷祿番禺蠶澤北鄙西郊殲厥凶徒罄無遺種斯則兆民之命修短所縣率土之基興亡是賴於是刑禮兼訓沿革有章中外咸平遐邇盪一用能使陽光合魄曜象呈暉樓閣遊庭抱仁含信宏勳該於厚地大道格於玄天義農炎昊以來卷領垂衣之世聖人濟物未有如斯者也夫備物典策桓文是膺助理陰陽蕭曹不讓未有功高於寓縣而賞薄於伊周凡厥人祇固懷延佇實由公謙搗自牧降損爲懷嘉數遲回永言增歎豈可申茲雅尙久廢朝猷宜戎司勳敬升鴻典且重華大聖媿炳惟賢盛德之祀無忘公侯之門必復是以殷嘉賈甫繼后稷之官堯命羲和纂重黎之位况其本枝攸建宜誓山河者乎其進公位相國總百揆封十郡爲陳公備九錫之禮加璽紱遠遊冠

綠纒綬位在諸侯王上其鎮衛大將軍揚州牧如故策曰大哉乾元資日月以貞觀至哉坤元憑山川以
載物故惟天爲大陟配者欽明惟王建國翼輔者齊聖是以文武之佐礚礚蘊其玉璜堯舜之臣榮河鑿
其金版況乎體得一之鴻姿靈陽九之危厄拯橫流於碣石撲燎火於崑岑驅馭於章彭跨躡於齊晉神
功行而靡用聖道運而無名者乎今將授公典策其敬聽朕命日者昊天不弔鍾亂於我國家網漏吞舟
疆胡內最茫茫宇宙慄慄黎元方足圓顛萬不遺一太清否亢橋山之痛已深大寶屯如平陽之禍相繼
上宰膺運康救兆民鞠旅於滇池之南揚旌於桂嶺之北懸三光於已墜謚四海於羣飛屠戮竄於中原
斯鯨鯢於濠汜蕩寧上國光啟中興此則公之大造於皇家者也旣而天未悔禍夷醜薦臻南夏崩騰西
京蕩覆羣胡孔熾藉亂乘間推納藩枝盜假神器冢司昏撓旁引寇讎旣見貶於桐宮方謀危於漢閣皇
運已殆何殊贅旒中國搖然非徒如綫公赫然投袂匡救本朝復莒齊都平戎王室朕所以還膺寶曆重
履宸居搢建武之風猷壽宣王之雅頌此又公之再造於皇家者也公應務之初登庸惟始三川五嶺莫
不窺臨銀洞珠宮所在靈謚孫盧肇譽越猶爲災番部防危勢將淪殄公赤旗所指祇壘洞開白羽纒搗
兇徒粉潰非其神武久喪南藩此又公之功也大同之末邊政不修李賁狂迷竊我交愛敢稱大號驕恣
甚於尉陀據有連州雄熾於梁碩公英睿雄算電掃風行馳御樓船直跨滄海新昌典澈備履艱難蘇

歷嘉靈盡爲京觀三山猿洞八角蠻陬逃矣水寓之鄉悠哉火山之國馬援之所不屑陶璜之所未開莫
不懼我王靈爭朝邊候歸蹕天府獻狀鴻臚此又公之功也自寇虜陵江宮闕幽辱公枕戈嘗膽提劍撫
心氣涌青霄神飛紫闥而番禺連率本自諸夷言得其朋是懷同惡公仗此忠誠乘機勒定執沛令而聲
鼓平新野而據鞍此又公之功也世道初艱方隅多難勳門桀黠作亂衡疑兵切池隍衆兼夷獠公以國
盜邊警知無不爲卹是同盟誅其醜類莫不魚驚鳥散面縛頭懸南土黔黎重保蘇息此又公之功也長
驅嶺嶠夢想京畿緣道會豪遞爲榛梗路養渠率全據大都蒼聚逋逃方謀阻亂百樓不戰雲梯之所未
窺萬弩齊張高輶之所非敵公龍驤虎步嘯吒風雲山靡墜城野無疆陣清祇氛於瀛石滅沴氣於雲都
此又公之功也遷仕凶慝屯據大阜乞活類馬騰之軍流民多杜叟之衆推鋒轉鬪自北徂南頻歲稽誅
寔惟勅虜公坐揮三路遙制六奇義勇同心貔貅驍力雷奔電擊谷靜山空列郡無犬吠之驚護祠罷狐
鳴之盜此又公之功也王師討虜次厓淪波兵乏兼儲士有飢色公回磨盞澤積穀巴三億庾之誅斯豐
壺漿之迎是衆軍民轉漕曾無砥柱之難艫舳相望如運敖倉之府犀渠貝冑顧蔑雷霆高艦層樓仰捫
霄漢故使三軍勇銳百戰無前承此兵糧遂殄凶逆此又公之功也若夫英圖邁俗義旅如雲溢壘猶攜
用淹戎略公志唯同獎師克在和鶴塞非虞鴻門是會若晉侯之誓白水如蕭王之推赤心屈禮交盟人

福感咽故能使舟師並路遠通朋心此又公之功也姑孰權要晴函阻惡寇據其關梁大盜負其肩負
公一校裁搗三雄並誓左賢右角沙潰土崩木甲殲於中原氈裘赴於江水他藉藉萬計千羣鄂坂之
隴斯開夷庚之道無塞此又公之功也護軍大眾俱集帝京逆豎凶徒猶屯皇邑若夫表裏山河金湯嶮
固疏龍首以抗殿捕華岳以爲城雜虜憑焉疆兵自若公回茲地軸抗此天羅曾不崇朝俾無遺囁軍容
甚穆國政方脩物重覩於衣冠民還瞻於禮樂楚人滿道爭覩於葉公漢老銜悲俱歡於司隸此又公之
功也內難初靜諸侯出關外郡傳烽鮮卑犯塞莫非且渠當戶中貴名王冀馬迺於淮南胡笳動於徐北
分舟師步甲巨野橫江殲厥羣叛遂殪封豨莫不絀木而止戎車靡遺過海而旋歸驂盡殲此又公之功
也公克黜禍難劬勞皇室而孫寧之黨翻啟狄心伊洛之間咸爲虜戍雖金陵佳氣石壘天嚴朝闔戎塵
夜喧胡鼓公三籌既畫八陣斯張裁舉靈鉞亦抽金僕咸俘醜類悉反高墉異李廣之皆誅同龐元之盡
赦此又公之功也任約叛渙臬聲不悛戎羯貪婪狼心無改穹廬氈幕抵北闕而爲營烏孫天馬指東都
而成陣公左甄右落箕張翼舒掃是機搶驗其獫狁長狄之種埋於國門椎髻之酋烹於軍市投秦坑而
盡沸噎澀水而不流此又公之功也一相居中自折彝鼎五湖小守妄懷同惡公夙徯兼道秉羽杖戈玉
斧將揮金鉞且戒祇會震懼遠請灰釘燕欄以表其含弘焚書以安其反側此又公之功也賊兪凶橫陵

唐具區阻兵安忍憑災怙亂自古蟲言鳥跡渾沌洪荒凡或虔劉未此殘酷公雖宗居汝潁世寓東南育

聖誕賢之鄉含章挺生之地眷言桑梓公私憤切卓爾英狀丞規奉算戮此大憝如烹小鮮此又公之功

也亂離永久羣盜孔多浙左凶渠連兵構逆豈止于兵五校白雀黃龍而已哉公以中軍無率選是親賢

奸寇途窮摧然冰泮刑漭唐又作之所文命動其大威雷門之間句踐行其嚴戮英規聖跡異代同風此又

公之功也同姓有扈頑凶不賓憑藉宗盟國危社稷觀兵匯澤勢震京師驅率南蠻已爲東帝公論兵於

廟堂之上決勝於樽俎之間寇賈樊勝浮江下瀨一朝搦撲無待旬師萬里澄清非勞新息此又公之功

也豫章祇寇依憑山澤繕甲完聚多歷歲時結從連橫爰洎交廣呂嘉旣獲吳淠已攬命我道師征其不

恪連營盡拔僞黨斯擒曜聖武於匡山回神旌於蠡派此又公之功也自八紘九野瓜剖豆分竊帝偷王

連州比縣公武靈已暢文德又宣折簡馳書風猷斯遠至於蒼蒼浴日杳杳無雷北洎丈夫之鄉南踰女

子之國莫不屈膝膜拜求吏歎闕此又公之功也京師禍亂亟積寒暄雙闕低昂九門寥豁靈秦宮之可

顧豈魯殿之猶存五都誓弁百僚卿士胡服纓纓咸爲戎俗高冠厚履希復華風宋微子麥穢之歌周大

夫黍離之歎方之於斯未足爲悲矣公求衣昧日晨食高春興構宮闈具瞻遐邇郊庠宗稷之典六符十

等之章遐聞太始之風流重觀永平之遺事此又公之功也公有濟天下之勳重之以明德凝神體道合

德符天用百姓以爲心隨萬機而成務恥一物非善之民歸含靈於仁壽之或上德不德無爲以爲夏

德符天用百姓以爲心隨萬機而成務聊一物非唐虞之民歸含靈於仁壽之域上德不德無爲以爲夏
長春生顯仁藏用忠信爲寶風雨弗愆仁惠爲基牛羊勿踐功成治定樂奏咸雲安上治民禮兼文質物
色巨圖衣裾里巷朝多君子野無遺賢菽粟同水火之饒工商富猗頓之旅是以天無蘊寶地有呈祥滂
露卿雲朝團曉映山車澤馬服馭登閑旣景煥於圖書方歲黷於史牒高勳踰於象緯積德冠於嵩華固
無德而稱者矣朕又聞之前王宰世茂賞尊賢式樹蕃長總征羣伯二南崇絕四履遐曠泱泱表海祚土
維齊巖巖泰山俾侯於魯抑又勤王反鄭夾輔遷周召伯之命斯隆河陽之禮咸備况復經營宇宙靈唯
斷鼈足之功弘濟蒼生非直鑿龍門之嶮而疇庸報德寂爾無聞朕所以垂拱當宇載懷慙慙者也今授
公相國以南豫州之陳留南丹陽宣城揚州之吳興東陽新安新寧南徐州之義興江州之鄱陽臨川十
郡封公爲陳公錫茲青土苴以白茅爰定爾邦用建冢社昔巨爽分陝俱爲保師晉鄭諸侯咸作卿士兼
其內外禮實攸宜今命使持節兼太尉王通授相國印綬陳公璽絨使持節兼司空王瑒授陳公茅土金
虎符第一至第五左竹使符第一至第十相國秩踰三鉉任總百司位絕朝班禮由事革其以相國總百
揆除錄尚書之號上所假節侍中貂蟬中書監印章中外都督太傅印綬義興公印策其鎮衛大將軍揚
州牧如故又加公九錫其敬聽後命以公禮爲楨幹律等銜策四維皆舉八柄有章是用錫公大輅戎輅

各一立牡二駟以公賤寶崇穀疏爵待農室富京坻民知榮辱是用錫公袞冕之服赤舄副焉以公調理
陰陽變諧風雅三靈允降萬國同和是用錫公軒縣之樂六佾之舞以公宣導王猷弘闡風教光景所照
觀象必通是用錫公朱戶以居以公抑揚清濁褒德進賢髦士盈朝幽人虛谷是用錫公納陛以登以公
巋然廊廟爲世鎔範折衝四表臨御八荒是用錫公虎賁之士三百人以公執茲明罰期在刑措象恭無
赦千紀必誅是用錫公斧鉞各一以公英猷遠量跨厲嵩溟包一車書括囊實字是用錫公彤弓一彤矢
百旅弓十旅矢千以公天經地義貫徹幽明春露秋霜允恭柔盛是用錫公租鬯一卣圭瓚副焉陳國置
丞相已下一遵舊式往欽哉其恭循朕命克相皇天弘建邦家允興洪業以光我高祖之休命十月戊辰
進高祖爵爲王以揚州之會稽臨海永嘉建安南徐州之晉陵信義江州之潯陽豫章安成廬陵并前爲
二十郡益封陳國其相國揚州牧鎮衛大將軍並如故又命陳王冕十有二旒建天子旌旗出警入蹕乘
金根車駕六馬備五時副車置旄頭雲罕樂舉八佾設鍾簾宮縣王妃王子王女爵命之號陳臺百官一
依舊典辛未梁帝禪位於陳詔曰五運更始三正迭代司牧黎庶是屬聖賢用能經緯乾坤彌綸區宇大
庇黔首闡揚鴻烈革晦以明積代同軌百王踵武咸由此則梁德溼微禍亂荐發太清云始見困長蛇承
聖之季又罹封豕爰至天成重竊神器三光亟沉七廟乏祀含生已泯鼎命斯墜我武元之祚有如綴旒

靜惟屯剝夕惕載懷相國陳王有命自天降神惟獄天地合德曷昭齊明拯社稷之橫流提億兆之塗炭
東誅逆叛北殲獯醜威加四海仁漸萬國復張崩樂重興絕禮儒館事脩戎亭虛候大功在舜盛績惟禹
巍巍蕩蕩無得而稱來獻白環豈直皇虞之世入貢素雉非止隆周之日固以效珍川陸表瑞烟雲甘露
醴泉旦夕凝涌嘉禾朱草孳植郊甸道昭於悠代勳恪於皇穹明明上天光華日月革故著於玄象代德
彰於圖讖獄訟有歸謳謌爰適天之厯數寔有攸在朕雖庸藐聞於古昔永稽崇替爲日已久敢忘列代
之遺典人祇之至願乎今便遜位別宮敬禪於陳一依唐虞宋齊故事策曰咨爾陳王惟昔上古厥初生
民驪連栗陸之前容成大庭之代並結繩寫鳥杳冥慌忽故靡得而詳焉自羲農軒昊之君陶唐有虞之
主或垂衣而御四海或無爲而子萬姓居之如馭朽索去之如脫敝屣裁遇許由便能捨帝暫逢善卷卽
以讓王故知玄扈璇璣非關尊貴金根玉輅示表君臨及南觀河渚東沉刻璧精華既竭耄勤已倦則抗
首而笑唯賢是與謗然作歌簡能斯授遣風餘烈昭晰圖書漢魏因循是爲故實宋齊授受又弘斯義我
高祖應期撫運握樞御宇三后重光祖宗齊聖及時屬陽九封豕荐食西都失馭夷狄交侵乃景天成輿
弄龜鼎懔懔黔首若崩厥角徽徽皇極將甚綴旒惟王乃聖乃神欽明文思二儀並運四時合序天錫智
勇人挺雄傑珠庭日角龍行虎步爰初投袂日迺勤王電掃番禺雲徹彭蠡揃其元惡定我京畿及王賀

帝引賢茲冠屨既行伊霍用保沖人震澤稽陰並懷叛逆瀆鷄醜虜三亂皇都裁命偏師二邦自殄薄伐
獫狁六戎盡殲嶺南叛渙湘郢結連賊帥旣擒凶渠傳首用能百揆時序四門允穆無思不服無違不屆
上達穹昊下漏淵泉蛟魚並見謳歌攸屬況乎長葦橫天已徵布新之兆璧日斯旣寔表更姓之符是以
始創義師紫雲曜彩肇惟尊主黃龍負舟楛矢素鞬梯山以至白環玉玦慕德而臻若夫安國字萌本因
萬物之志時乘御宇良會樂推之心七百無常期皇王非一族昔木德旣季而傳祚於我有梁天之厯數
允集明哲式遵前典廣詢羣議王公卿尹莫不攸屬敬從人祇之願授帝位於爾躬四海困窮天祿永終
王其允執厥中軌儀前式以副溥天之望禋祀上帝時膺大禮永固洪業豈不盛歟又璽書曰君子者自
昭明德達人者先天弗違故能進退咸亨動靜元吉朕雖蒙寡庶乎景行何則三才剖判九有區分情性
相乖亂離云起是以建彼司牧推乎聖賢授受者任其時來皇王者本非一族人謀是與屈己從萬物之
心天意斯歸鞠躬奉百靈之命謳謨所往則攘袂以膺之菁華已竭乃褰裳而去之昔在唐虞鑒於天道
舉其黎獻授彼明哲雖復質文殊軌沿革不同歷代因循斯風靡替我大梁所以考庸太室接禮貳宮月
正元日受終文祖但運不常夷道無恒泰山岳傾偃河海沸騰電目雷聲之禽鉤爪鋸牙之獸咀齧含生
不知紀極二后英聖相仍在天大夷貪狡爭侵中國縣王都帝人懷千紀一民尺土皆非梁地朕以不造

幼穉閔凶仰憑衡佐亟移年序周成漢惠邈矣無階惟是童蒙必貽顛覆若使時無聖哲世靡艱難猶當
高蹈於滄洲自求於泰伯者矣惟王應期誕秀開錄握圖性道故其難聞嘉庸已其被物乾行同其靈覆
日御比其貞明登承聖於復禹之功樹鞠子於興周之業滅陸渾於伊洛殲驪戎於鎬京大小二震之驍
徒東南兩越之勅寇遽行天討無遺神策於是祖述堯舜憲章文武大樂與天地同和大禮與天地同節
鼓之以雷霆潤之以風雨仁霑葭葦信及豚魚殷牖斯空夏臺虛設民惟大畜野有同人升平頌平無偏
無黨固以雲飛紫蓋水躍黃龍東伐西征旒映川陸榮光曖曖已冒郊塵甘露瀼瀼亟流庭苑車轍馬跡
誰不率從蟠水流沙誰不懷德祥圖遠至非唯赤伏之符靈命昭然何止黃星之氣海口河目暨聖之表
既彰握旄執鉞君人之狀斯偉且自攝提無紀孟陬殄滅枉矢宵飛天弧曉映久矣夷羊之在牧時哉蛟
龍之出泉革運之兆咸徵惟新之符並集朕所以欽若勛華履回星瑄昔者木運斯盡予高祖受焉今麻
去炎精神歸樞紐敬以火德傳于爾陳遠鑒前王近謀羣辟明靈有悅率土同心今遣使持節兼太保侍
中尙書左僕射平樂亭侯王通兼太尉司徒左長史王瑒奉皇帝璽綬受終之禮一依唐虞故事王其時
陟元后靈育兆良光闡洪猷以承昊天之休命是日梁帝遜于別宮高祖謙讓再三羣臣固請乃許

高祖紀上吳興長城下若里人○若監本誤春一統志湖州長興晉名長城有上若下若若亦作箬今從

南史改正

投直閣將軍封新安子○安南史作枋

李遷仕許身當陽○許一本作託

乃以舩舳貯石沉塞淮口○舩南史作般

改大寶三年爲承聖元年湘州平高祖旋鎮京口○梁書湘州平係承聖二年事

丙午貞陽侯遜位○丙字南本俱作景此本俱作丙蓋後人所改也

丁丑載及北叟來降○南史北叟上有龔從第三字蓋韋載杜龔已見上文突云北叟不知爲何人矣

楚州刺史劉仕榮淮州刺史柳達摩領兵萬人於胡墅渡○南史仕作士胡作湖

先是太白自十一月丙戌不見乙卯出於東方○乙卯上南史有十二月三字

龔齊行臺趙彥琛於瓜步○琛南史作深

屠獯鬻於中原○龔閣本注一作獯

乃泉天成輕弄龜鼎○泉南史闕一本誤衆

時乘御宇○字監本誤辯今改從南本

唐 散 騎 常 侍 姚 思 廉 撰

本紀第二

高祖下

永定元年冬十月乙亥高祖卽皇帝位于南郊柴燎告天曰皇帝臣霸先敢用玄牡昭告于皇皇后帝梁氏以地剝荐臻麻運有極欽若天應以命于霸先夫肇有烝民乃樹司牧選賢與能未常厥姓放勛重華之世咸無意於受終當塗典午之君雖有心於揖讓皆以英才處萬乘高勳御四海故能大庇黔首光宅區縣有梁末運仍葉薳屯獮醜憑陵久移神器承聖在外非能祀夏天未悔禍復罹寇逆嫡嗣廢黜宗枝僭詐天地蕩覆紀綱泯絕霸先爰初投袂大拯橫流重舉義兵實哉多難廢王立帝寔有厥功安國定社用盡其力是謂小康方期大道旣而烟雲表色日月呈瑞緯聚東井龍見譙邦除舊布新旣彰玄象遷虞事夏且協謳誦九域八荒同布衷歎百神羣祀皆有誠願梁帝高謝萬邦授以大寶霸先自惟菲薄讓德不嗣至于再三辭弗獲許僉以百姓須主萬機難曠皇靈眷命非可謙拒畏天之威用膺嘉祚永言夙志能無慙德敬簡元辰升壇受禪告類上帝用答民心永保于我有陳惟明靈是饗先是氛霧晝夜晦冥至

于是日景氣清晏識者知有天道焉禮畢輿駕還宮臨太極前殿詔曰五德更運帝王所以御天三正相
因夏殷所以宰世雖色分辭翰時異文質揖讓征伐迄用參差而育德振民義歸一揆朕以寡昧時屬艱
危國步屢屯天維三絕肆勤先后拯厥橫流藉將帥之功兼猛士之力一匡天下再造黔黎梁氏以天祿
承終祿數攸在遵與能之典集大命于朕躬顧惟非德辭不獲亮式從天降俯協民心受終文祖升禋上
帝繼述百王君臨萬宇若涉川水罔知攸濟寶業初建皇祚惟新思俾惠澤覃被億兆可大赦天下改梁
太平二年爲永定元年賜民爵二級文武二等鰥寡孤獨不能自存者人穀五斛逋租宿債皆勿復收其
有犯鄉里清議賊汙淫盜者皆洗除先注與之更始長徒赦繫特皆原之亡官失爵禁錮奪勞一依舊典
又詔曰禮陳杞宋詩詠二客弗臣之重歷代斯敦梁氏欽若人祇憲章在昔濟河沉璧高謝萬邦茅賦所
加宜遵舊典其以江陰郡奉梁主爲江陰王行梁正朔車旗服色一依前準宮館資待務盡優隆又詔梁
皇太后爲江陰國太妃皇后爲江陰國妃又詔百司依位攝職丙子輿駕幸鍾山祀蔣帝廟戊寅輿駕幸
華林園親覽詞訟臨赦囚徒己卯分遣大使宣勞四方下璽書赦州郡曰夫四王革代商周所以應天五
勝相推軒轅所以當運梁德不造喪亂積年東夏崩騰西都蕩覆蕭勃干紀非唯趙倫侯景滔天踰於劉
載貞陽反篡賊約連兵江左累屬於鮮卑金陵久非於梁國自有氤氳混沌之世龍圖鳳紀之前東漢興

平之初西朝永嘉之亂天下分崩未有若於梁朝者也朕以虛薄屬當興運自昔登庸首清諸越徐門浪泊靡不征行浮海乘山所在裁定冒愆風塵馳師旅大延梁祀十蕩彊寇豈曰人謀皆由天啟梁氏以天祿斯改期運永終欽若唐虞推其鼎玉朕東西退讓拜手陳辭避舜子於箕山之陽求支伯於滄洲之野而公卿敦逼率土翹惶天命難稽遂享嘉祚今月乙亥升禮太壇言念遷桐但有懋德自梁氏將末頻月亢陽火運斯終秋霖奄降翌日成禮圓丘宿設埃雲晚霽星象夜張朝景重輪泣三危之膏露晨光合鑿帶五色之卿雲顧惟寡薄彌慙休祉昧且不顯方思至治卿等擁旄方岳相任股肱剖符名宇方寄恤隱王厯惟新念有欣慶想深求民瘼務在廉平愛惠以撫孤貧威刑以禦彊猾若有萑蒲之盜或犯戎商山谷之會擅疆幽險皆從肆赦咸使知聞如或迷途俾在無貸今遣使人具宣往旨念思善政副此虛懷庚辰詔出佛牙於杜姥宅集四部設無遮大會高祖親出關前禮拜初齊故僧統法獻於烏纏國得之常在定林上寺梁天監末爲攝山慶雲寺沙門慧興保藏慧興將終以屬弟慧志承聖末慧志密送于高祖至是乃出辛巳追尊皇考曰景皇帝廟號太祖皇妣董太夫人曰安皇后追諡前夫人錢氏號爲昭皇后世子克爲孝懷太子立夫人章氏爲皇后癸未尊景帝陵曰瑞陵昭皇后陵曰嘉陵依梁初園陵故事立刪定郎治定律令戊子遷景皇帝神主祔于太廟辛卯以中權將軍開府儀同三司丹陽尹王沖爲左光

祿大夫癸巳追贈皇兄梁故散騎常侍平北將軍兖州刺史長城縣公道譚驃騎大將軍太尉封始興郡王弟梁故侍中驃騎將軍南徐州刺史武康縣侯休先車騎大將軍司徒封南康郡王是月西討都督周文育侯安都於郢州敗績囚于王琳十一月丙申詔曰東都齊國義乃親賢西漢城陽事兼功烈散騎常侍使持節都督會稽等十郡軍事宣毅將軍會稽太守長城縣侯禧學尚清優神寓凝正文參禮樂武定妖氛心力謀猷爲家治國擁旌作守葺月有成辟彼關河功踰蕭寇萑蒲之盜自反耕農篳竹之豪用稟聲朔朕以虛寡屬當興運提彼三尺賓于四門王業艱難賴乎此子宜隆上爵稱是元功可封臨川郡王邑二千戶兄子梁中書侍郎瓊襲封始興王弟子梁中書侍郎曇朗襲封南康王禮秩一同正王己亥甘露降于鍾山松林彌滿巖谷庚子開善寺沙門採之以獻敕頒賜羣臣丙辰以鎮西將軍南豫州刺史徐度爲鎮右將軍領軍將軍庚申京師大火十二月庚辰皇后謁太廟

二年春正月乙未詔曰夫設官分職因事重輕羽儀車馬隨時隆替晉之五枝鳴笳啟途漢之九卿傳呼並迓虞官夏禮豈曰同科殷朴周文固無恒格朕膺茲寶歷代是天工留念官方庶允時衷梁天監中左右驃騎領朱衣直閣並給儀從北徐州刺史昌義之初首爲此職亂離歲久朝典不存後生年少希聞舊則今去左右驃騎宜通文武文官則用腹心武官則用功臣所給儀從同太子二衛率此外衆官尙書諱

爲修制車騎將軍開府儀同三司侯瓊進位司空瓊將軍開府儀同三司所余五七錄卷之三

爲條制車騎將軍開府儀同三司侯瑱進位司空中權將軍開府儀同三司新除左光祿大夫王沖爲太子少傅左衛將軍徐世譜爲護軍將軍南兗州刺史吳明徹進號安南將軍衡州刺史歐陽頎進號鎮南將軍辛丑輿駕親祀南郊詔曰朕受命君臨初移星瑄孟陬嘉月備禮泰壇景候昭華人祗允慶思令億兆咸與惟新且往代祇氛于今猶梗軍機未息徵賦咸繁事不獲已久知下弊言念黔黎無忘寢食夫罪無輕重已發覺未發覺在今昧爽以前皆赦除之西寇自王琳以下並許返迷一無所問近所募義軍本擬西寇並宜解遣留家附業輓訂軍資未送者並停元年軍糧逋餘者原其半州郡縣軍戍並不得輒遣使民間務存優養若有侵擾嚴爲法制乙巳輿駕親祀北郊甲辰振遠將軍梁州刺史張立表稱云乙亥歲八月丹徒蘭陵二縣界遺山側一旦因濤水涌生沙漲周旋千餘頃並膏腴堪墾植戊午輿駕親祀明堂二月壬申南豫州刺史沈泰奔于齊辛卯詔車騎將軍司空侯瑒總督水步衆軍以遏齊寇三月甲午詔曰罰不及嗣自古通典罪疑惟輕布在方策沈泰反覆無行遐邇所知昔有微功仍荷朝寄削符名郡推轂累薄漢口班師還居方岳良田有逾於四百食客不止於三千富貴顯榮政當如此鬼害其盈天奪之魄無故猖狂自投羈醜雖復知人則哲惟帝其難光武有蔽於龐萌魏武不知於于禁但令朝廷無我負人其部曲妻兒各令復業所在及軍人若有恐脅侵掠者皆以劫論若有男女口爲人所藏並許詣臺

申訴若樂隨臨川王及節將立効者悉皆聽許乙卯高祖幸後堂聽訟還於橋上觀山水賦詩示羣臣是月王琳立梁承嘉王蕭莊于郢州夏四月甲子輿駕親祀太廟乙丑江陰王暹詔遣太宰弔祭司空監護喪事凶禮所須隨由備辦以梁武林侯蕭諮息季卿嗣爲江陰王丙寅輿駕幸石頭餞司空侯瑱戊辰重雲殿東鷓尾有紫煙屬天五月乙未京師地震癸丑齊廣陵南城主張顯和長史張僧那各率其所部入附辛酉輿駕幸大莊嚴寺捨身壬戌羣臣表請還宮六月己巳詔司空侯瑱領軍將軍徐度率舟師爲前軍以討王琳秋七月戊戌輿駕幸石頭親送瑱等己亥江州刺史周迪擒王琳將李孝欽樊猛余孝頃于工塘甲辰遣吏部尙書謝哲諭王琳甲寅嘉禾一穗六岐生五城初侯景之平也火焚太極殿承聖中議欲營之獨闕一柱至是有樟木大十八圍長四丈五尺沈泊陶家後渚監軍鄒子度以聞詔中書令沈衆兼起部尙書少府卿蔡儁兼將作大匠起太極殿八月丙寅以廣梁郡爲陳留郡辛未詔臨川王禧西討以舟師五萬發自京師輿駕幸冶城寺親送焉前開府儀同三司南豫州刺史周文育前鎮北將軍南徐州刺史新除開府儀同三司侯安都等於王琳所逃歸自劾廷尉卽日引見並宥之戊寅詔復文育等本官壬午追封皇子立爲豫章王諡曰獻權爲長沙王諡曰思長女爲永世公主諡曰懿謝哲反命王琳請還鎮湘川詔追衆軍緩其伐癸未西討衆軍至自大雷丁亥以信威將軍江州刺史周迪爲開府儀同三

司進號平南將軍改南徐州所領南蘭陵郡復爲東海郡冬十月庚午遣鎮南將軍開府儀同三司周文育都督衆軍出豫章討余孝劬乙亥輿駕幸莊嚴寺發金光明經題丁酉以仁威將軍高州刺史黃法甌爲開府儀同三司進號鎮南將軍甲寅太極殿成匠各給復十二月庚申侍中安東將軍臨川王蒨率百僚朝前殿拜上牛酒甲子輿駕幸大莊嚴寺設無算大會捨乘輿法物羣臣備法駕奉迎卽日輿駕還宮丙寅高祖於太極殿東堂晏羣臣設金石之樂以路寢告成也壬申割吳郡鹽官海鹽前京三縣置海鹽郡屬揚州以安成所部廣興大洞置安樂郡丙戌以靈遠將軍北江州刺史熊曇朗爲開府儀同三司進號平西將軍丁亥詔曰梁時舊仕亂離播越始還朝廷多未銖序又起兵已來軍勳甚衆選曹卽條文武簿及節將應九流者量其所擬於是隨材擢用者五十餘人

三年春正月己丑青龍見于東方丁酉以鎮南將軍廣州刺史歐陽頎卽本號開府儀同三司是夜大雪及旦太極殿前有龍跡見甲午廣州刺史歐陽頎表稱白龍見于州江南岸長數十丈大可八九圍歷州城西道入天井崗仙人見于羅浮山寺小石樓長三丈所通身潔白衣服楚麗辛丑詔曰南康始興王諸妹已有封爵依禮止是藩主此二王者有殊恒情宜隆禮數諸主儀秩及尙主可並同皇女戊申詔臨川王蒨省揚徐二州辭訟二月辛酉以平西將軍桂州刺史瀘于量爲開府儀同三司進號鎮西大將軍壬

午司空侯瑱督衆軍自江入合州焚齊舟艦三月丙申侯瑱至自合肥衆軍獻捷夏閏四月庚寅詔曰開
廩賑絕育民之大惠巡方恤患前王之令典朕當斯季俗膺此樂推君德未孚民瘼猶甚重茲多壘彌攻
納隍良由四聰弗達千里勿應博施之仁何其或爽殘弊之軌致此未康吳州縉州去歲蝗旱郢田雖疏
鄭渠終涸室靡盈積之望家有填壑之嗟百姓不足兆民何賴近已遣中書舍人江德藻銜命東陽與令
長二千石問民疾苦仍以入臺倉見米分恤雖德非既飽庶微慰阻飢甲午詔依前代置西省學士兼以
伎術者預焉丁酉遣鎮北將軍徐度率衆城南皖口是時久不雨丙午輿駕幸鍾山祀蔣帝廟是日降雨
迄于月晦五月丙辰朔日有食之有司奏舊儀御前殿服朱紗袍通天冠詔曰此乃前代承用意有未同
合朔仰助太陽宜備袞冕之服自今已去永可爲准丙寅扶南國遣使獻方物乙酉北江州刺史熊曇朗
殺都督周文育于軍舉兵反王琳遣其將常衆愛曹慶率兵援余孝勣六月戊子儀同侯安都敗衆愛等
於左里獲琳從弟襲主帥羊暕等三十餘人衆愛遁走庚寅廬山民斬之傳首京師甲午衆師凱歸詔曰
曇朗噬逆罪不容誅分命衆軍仍事掩討方加梟磔以明刑憲徵臨川王禧往皖口置城柵以錢道戢守
焉丁酉高祖不豫遣兼太宰尙書左僕射王通以疾告太廟兼太宰中書令謝哲告大社南北郊辛丑高
祖疾小瘳故司空周文育之柩至自建昌壬寅高祖素服哭于東堂哀甚癸卯高祖臨訊獄訟是夜熒惑

在天尊高祖疾甚丙午崩于瑤環殿時年五十七遺詔追臨川王禧入纂甲寅大行皇帝遷殯于太極殿西階杪八月甲午羣臣上諡曰武皇帝廟號高祖丙申葬萬安陵高祖智以綏物武以寧亂英謀獨運人皆莫及故能征伐四克靜難夷凶至升大麓之日居阿衡之任恒崇寬政愛育爲本有須發調軍儲皆出於事不可息加以儉素自率常膳不過數品私饗曲宴皆瓦器蚌盤肴核庶羞裁令充足而已不爲虛費初平侯及立紹泰子女玉帛皆班將士其充闔房者衣不重綵飾無金翠哥鍾女樂不列於前及乎踐阼彌厲恭儉故隆功茂德光有天下焉

陳吏部尚書姚察曰高祖英略大度應變無方蓋漢高魏武之亞矣及西都盪覆誠貫天人王僧辯闕伊尹之才空結桐宮之情貞陽假秦兵之送不思穆嬴之泣高祖乃蹈玄機而撫末運乘勢隙而拯橫流王迹所基始自於此何止觀黎升師之捷而已焉故於慎徽時序之世變聲改物之辰兆庶歸以謳詠炎靈去如釋負方之前代何其美乎

陳書卷二

陳書卷二考證

高祖紀下輿駕幸大莊嚴寺設無尋大會○宋書尋同礙浮屠字也南史作碍

甲午廣州刺史歐陽頎表稱白龍見於州江南岸○臣人龍按上文書丁酉夜大雪則甲午爲前一日不

應顛倒在後若南史稱甲子則以下文辛丑考之又不相合定有訛字不可考矣

徵臨川王蒨○蒨一本作諱蓋仍姚察之舊也

陳書卷二考證

唐 傲 騎 常 侍 姚 思 廉 撰

本紀第三

世祖

世祖文皇帝諱禧字子華始興昭烈王長子也少沉敏有識量美容儀留意經史舉動方雅造次必遵禮法高祖甚愛之常稱此兒吾宗之英秀也梁太清初夢兩日鬪一大一小大者光滅墜地色正黃其大如斗世祖因三分取一而懷之侯景之亂鄉人多依山湖寇抄世祖獨保家無所犯時亂日甚乃避地臨安乃高祖舉義兵侯景遣使收世祖及衡陽獻王世祖乃密袖小刀冀因入見而害景至便屬吏故其事不行高祖大軍圍石頭景欲加害者數矣會景敗世祖乃得出赴高祖營起家爲吳興太守時宣城劫帥紀機郝仲等各聚衆千餘人侵暴郡境世祖討平之承聖二年授信武將軍監南徐州三年高祖北征廣陵世祖爲前軍每戰克捷高祖之將討王僧辯也先召世祖與謀時僧辯女婿杜龕據吳興兵衆甚盛高祖密令世祖還長城立柵以備龕世祖收兵纔數百人戰備又少龕遣其將杜泰領精兵五千乘虛奄至將士相視失色而世祖言笑自若部分益明於是衆心乃定泰知柵內人少日夜苦攻世祖激厲將士身

當矢石相持數旬秦乃退走及高祖遣周文育率兵討龔世祖與并軍往吳興時龔兵尙衆斷據衝要水步連陣相結世祖命將軍劉澄蔣元舉率衆攻龔龔軍大敗窘急因請降東揚州刺史張彪起兵圍臨海太守王懷振懷振遣使求救世祖與周文育輕兵往會稽以掩彪後彪將沈泰開門納世祖世祖盡收其部曲家累彪至又破走若邪村民斬彪傳其首以功授持節都督會稽等十郡諸軍事宣毅將軍會稽太守山越深險皆不賓附世祖分命討擊悉平之威惠大振高祖受禪立爲臨川郡王邑二千戶拜侍中安東將軍及周文育侯安都敗於沌口高祖詔世祖入衛軍儲戎備皆以委焉尋命率兵城南皖永定三年六月丙午高祖崩遺詔徵世祖入纂甲寅至自南皖入居中書省皇后令曰昊天不弔上玄降禍大行皇帝奄捐萬國率土哀號普天如喪窮酷煩冤無所追及諸孤藐爾反國無期須立長主以寧寓縣侍中安東將軍臨川王禕體自景皇屬惟猶子建殊功於牧野敷盛業於澹黎納麓時敘之辰負辰乘機之日並佐時雍是同草創祧祔所繫遐邇宅心宜奉大宗嗣膺寶錄使七廟有奉兆民寧晏未亡人假延餘息嬰此百罹尋繹纏綿興言感絕世祖固讓至于再三羣公卿士固請其日卽皇帝位於太極前殿詔曰上天降禍奄集邦家大行皇帝背離萬國率土崩心若喪考妣龍圖寶祚眇朕躬運鍾擾攘事切機務南面

須主西讓禮輕今便式膺景命光宅四海可大赦天下罪無輕重悉皆蕩滌道租宿債吏民億萬可勿復

收文武內外量加爵敘孝悌力田爲父後者賜爵一級庶祇畏在心公卿畢力勝殘去殺無待百年興言
號嘔深增慟絕又詔州郡悉停奔赴秋七月丙辰尊皇后爲皇太后己未以鎮南將軍開府儀同三司廣
州刺史歐陽頎進號征南將軍平南將軍開府儀同三司周迪進號鎮南將軍平南將軍開府儀同三司
高州刺史黃法甌進號安南將軍庚申以鎮南大將軍開府儀同三司桂州刺史澹于量進號征南大將
軍辛酉以侍中車騎將軍司空侯瑱爲太尉鎮西將軍開府儀同三司南豫州刺史侯安都爲司空侍中
中權將軍開府儀同三司王沖爲特進左光祿大夫鎮北將軍南徐州刺史徐度爲侍中中撫軍將軍開
府儀同三司壬戌以侍中護軍將軍徐世譜爲特進安右將軍侍中忠武將軍杜稜爲領軍將軍乙丑重
雲殿災八月癸巳以平北將軍南徐州刺史留異爲安南將軍縉州刺史平南將軍北江州刺史魯悉達
進號安左將軍庚戌封皇子伯茂爲始興王奉昭烈王後徙封始興嗣王瑱爲安成王九月辛酉立皇子
伯宗爲皇太子王公以下賜帛各有差乙亥立妃沈氏爲皇后冬十一月乙卯王琳寇大雷詔遣太尉侯
瑱司空侯安都儀同徐度率衆以禦之

天嘉元年春正月癸丑詔曰朕以寡昧嗣纂洪業哀憚在疚治道弗昭仰惟前德幽顯遐暢恭己不言庶
幾無改雖宏圖懋軌日月方弘而清廟廓然聖靈浸遠感尋永往瞻言罔極今四象運周三元告獻華夷

胥洎玉帛駿奔思覃遺澤播之億兆其大赦天下改永定四年爲天嘉元年繆寡孤獨不能自存立者賜穀人五斛孝悌力田殊行異等加爵一級甲寅分遣使者宣勞四方辛酉輿駕親祀南郊詔曰朕式饗上玄虔奉牲玉高禋禮畢誠敬兼弘且陰霾浹辰寒霽在日雲物韶朗風景清和慶動人祇怵流庶俗思俾黎元同此多祐可賜民爵一級辛未輿駕親祀北郊日有冠二月辛卯老人星見乙未高州刺史紀機自軍叛還宣城據郡以應王琳涇令賀當遷討平之內申太尉侯瑱敗王琳于梁山攻齊兵于博望生擒齊將劉伯球盡收其資儲船艦俘馘以萬計王琳及其主蕭莊奔于齊戊戌詔曰夫五運遞來三靈眷命皇王因之改創殷周所以樂推朕統祿承基丕隆鼎運期理攸屬數祚斯在豈儻倖所至盍卜祝可求故知神器之重必在符命是以逐鹿貽譏斷蛇定業亂臣賊子異世同尤王琳識暗挈瓶智慙衛足干紀亂常自貽顛沛而縉紳君子多被縶維涇渭合流蘭鮑同肆求之厥理或有脅從今九戩旣設八紘斯掩天網恢恢吞舟是漏至如伏波遊說永作漢蕃延壽脫歸終爲魏守器改秦虞材通晉楚行藏用捨亦豈有恒宜加寬仁以彰雷作其衣冠士族預在凶黨悉皆原有將帥戰兵亦同肆眚並隨才銓引庶收力用又詔師旅以來將士死王事者並加贈諡己亥詔曰日者凶渠肆虐衆軍進討舟艦輸積權倩民丁師出經時役勞日久今氛祲廓清宜有甄被可蠲復丁身夫妻三年於役不幸者復其妻子庚子分遣使者齎鹽

書宣勞四方乙巳遣太尉侯瑱鎮滋城庚戌以高祖第六子昌爲驍驍將軍湘州牧立爲衡陽王三月丙辰詔曰自喪亂以來十有餘載編戶凋亡萬不遺一中原氓庶蓋云無幾頃者寇難仍接算斂繁多且興師以來千金日費府藏虛竭杼軸歲空近所置軍資本充戎備今元惡克殄八表已康兵戈靜戢息肩方在思俾餘黎陶此寬賦今歲軍糧通減三分之一尙書申下四方稱朕哀矜之意守宰明加勸課務急農桑庶鼓腹含哺復在茲日蕭莊所署郢州刺史孫瑒舉州內附丁巳江州刺史周迪平南中斬賊率熊曇朗傳首京師先是齊軍守魯山城戊午齊軍棄城走詔南豫州刺史程靈洗守之甲子分荊州之天門義陽南平鄧州之武陵四郡置武州其刺史督沅州領武陵太守治武陵郡其都尉所部六縣爲沅州別置通靈郡以刺史領太守治都尉城省舊都尉以安南將軍南兗州刺史新除右衛將軍吳明徹爲安西將軍武州刺史僞郢州刺史孫瑒爲安南將軍湘州刺史丙子衡陽王昌薨丁丑詔曰蕭莊僞署文武官屬還朝者量加錄序夏四月丁亥立皇子伯信爲衡陽王奉獻王後乙未以安南將軍荀朗爲安北將軍合州刺史五月乙卯改桂陽之汝成縣爲廬陽郡分衡州之始興安遠二郡置東衡州六月辛巳改諡皇祖妣景安皇后曰景文皇后壬辰詔曰梁孝元遭離多難靈樞播越朕昔經北面有異常倫遣使迎接以次近路江寧既有舊塋宜卽安卜車旗禮章悉用梁典依魏葬漢獻帝故事甲午追策故始興昭烈王妃曰

孝妃丁酉以開府儀同三司徐度爲侍中中軍將軍辛丑國哀周忌上臨于太極前殿百僚陪哭赦京師
殊死已下是月葬梁元帝於江寧秋七月甲寅詔曰朕以眇身屬當大寶負荷至重憂責實深而庶績未
康胥怨猶結佇咨賢良發於夢想每有一言入聽片善可求何嘗不褒獎抽揚緘書紳帶而傳巖虛往窮
咎尙淹滯幣空陳旌弓不至豈當有乖則哲使草澤遺才將時運澆流今不逮古側食長懷寢興增歎新
安太守陸山才有啟薦梁前征西從事中郎蕭策梁前尙書中兵郎王暹並世胄清華羽儀著族或文史
足用或孝德可稱並宜登之朝序擢以不次王公已下其各進舉賢良申薦淪屈庶衆才必萃大廈可成
使械樸載歌由庚在詠乙卯詔曰自頃喪亂編戶播遷言念餘黎良可哀惕其亡鄉失土逐食流移者今
年內隨其適樂來歲不問僑舊悉令著籍同土斷之例丙辰立皇子伯山爲鄱陽王八月庚辰老人星見
壬午詔曰菽粟之貴重於珠玉自頃寇戎游手者衆民失分地之業士有佩犢之譏朕哀矜黔庶念康弊
俗思俾阻饑方存富教麥之爲用要切斯甚今九秋在節萬寶可收其班宣遠近並令播種守宰親臨勸
課務使及時其有尤貧量給種子癸未世祖臨景陽殿聽訟戊子詔曰汗鬴土鼓誠則難追豐叨彫薪或
可易革梁氏未運奢麗已甚麴豢厭於胥史歌鍾列於管庫牛木被朱丹之采車馬飾金玉之珍逐欲澆
流遷訛遂遠朕自諸生頗爲內足而家敦朴素室靡浮華觀覽時俗常所扼腕今妄假時乘臨馭區極屬

當淪季思闕治道菲食卑宮自安儉陋俾茲薄俗獲反淳風維雕鏤淫飾非兵器及國容所須金銀珠玉衣服雜玩悉皆禁斷甲午周將賀若敦率馬步一萬奄至武陵武州刺史吳明徹不能拒引軍還巴陵丁酉上幸正陽堂閱武九月癸丑彗星見乙卯周將獨孤盛領水軍將趣巴湘與賀若敦水陸俱進太尉侯瑱自尋陽往禦之辛酉遣儀同徐度率衆會瑱于巴丙子太白晝見丁丑詔侯瑱衆軍進討巴湘十月癸巳侯瑱襲破獨孤盛於楊葉洲盡獲其船艦盛收兵登岸築城以保之丁酉詔司空侯安都率衆會侯瑱南討十二月乙未詔曰古者春夏二氣不決重罪蓋以陽和布澤天秩是弘寬網省刑義符合育前王所以則天象地立法垂訓者也朕屬當澆季思求民瘼哀矜惻隱念甚納隍常欲式遵舊軌用長風化自今孟春訖于夏首罪人大辟事已欵者宜且申停己亥周巴陵城主尉遲憲降遣巴州刺史侯安都守之庚子獨孤盛將餘衆自楊葉洲潛遁

二年春正月庚戌大赦天下以雲麾將軍晉陵太守杜稜爲侍中領軍將軍辛亥以始興王伯茂爲宣惠將軍揚州刺史乙卯合州刺史裴景徽奔于齊辛未周湘州城主殷亮降湘州平二月丙戌以太尉侯瑱爲車騎將軍湘州刺史庚寅曲赦湘州諸郡三月乙卯太尉車騎將軍湘州刺史侯瑱薨丁丑以鎮東將軍會稽太守徐度爲鎮南將軍湘州刺史夏四月分荊州之南平宜都羅河東四郡置南荊州鎮河東郡

以安西將軍武州刺史吳明徹爲南荊州刺史庚寅以安左將軍魯悉達爲安南將軍吳州刺史辛卯老人星見秋七月丙午周將賀若敦自拔遁歸人畜死者十七八武陵天門南平義陽河東宜都郡悉平九月甲寅詔曰姬業方闡望載涓瀆漢厥旣融道邇圯上若乃摘精辰宿降靈惟岳風雲有感夢寐是求斯固舟楫鹽梅遞相表裏長世建國罔或不然至於銘德太常從祀清廟以貽厥後來垂諸不朽者也前皇經濟區宇裁成品物靈貺式甄光膺寶命雖睿明濬發幽顯協從亦文武賢能翼宣王業故大司馬驃騎大將軍瑱故司空文育故平北將軍開府儀同三司僧明故中護軍穎故領軍將軍擬或締構艱難經綸夷險或摧鋒冒刃殉義遺生或宣哲協規綢繆帷幄或披荆汗馬終始勤劬莫不馨誠悉力屯泰以之朕以真昧嗣膺丕緒永言勳烈思弘典訓便可式遵故實載揚盛軌可並配食高祖廟庭俾茲大猷永傳宗祏丙辰以侍中中權將軍特進左光祿大夫開府儀同三司王冲爲丹陽尹丹陽尹沈君理爲左民尙書領步兵校尉冬十月乙巳霍州西山蠻率部落內屬十一月乙卯高麗國遣使獻方物甲子以武昌國川爲竟陵郡以安流民十二月辛巳以安東將軍吳郡太守孫錫爲中護軍甲申立始興國廟於京師用王者之禮太子中庶子虞荔御史中丞孔奐以國用不足奏立煮海鹽賦及榷酤之科詔並施行先是縉州刺史留異應于王琳等反丙戌詔司空侯安都率衆討之

三年春正月庚戌設帷宮於南郊幣告胡公以配天辛亥與禰親祀南郊詔曰朕質荷寶圖而四星瑋就
就業業庶幾治定而德化不孚俗弊滋甚永言念之無忘日夜陽和布氣昭事上玄躬奉牲玉誠兼饗敬
思與黎元被斯寬惠可普賜民爵一級其孝悌力田別加一等辛酉與禰親祀北郊閏二月己酉以百濟
王餘明爲撫東大將軍高句驪王高湯爲寧東將軍江州刺史周迪舉兵應留異襲濫城攻豫章郡並不
克辛亥以南荊州刺史吳明徹爲安右將軍甲子改鑄五銖錢三月丙子安成王瑒至自周詔授侍中中
書監中衛將軍置佐史丁丑以安右將軍吳明徹爲安南將軍江州刺史督衆軍南討甲申大赦天下庚
寅司空侯安都破留異於桃支嶺異脫身奔晉安東陽郡平夏四月癸卯曲赦東陽郡乙巳齊遣使來聘
六月丙辰以侍中中衛將軍安成王瑒爲驃騎將軍揚州刺史以會稽東陽臨海永嘉新安新寧晉安建
安八郡置東揚州以揚州刺史始興王伯茂爲鎮東將軍東揚州刺史征北將軍司空南徐州刺史侯安
都爲侍中征北大將軍秋七月己丑皇太子納妃王氏在位文武賜帛各有差孝悌力田爲父後者賜爵
二級九月戊辰朔日有食之以侍中都官尙書到仲舉爲尙書右僕射丹陽尹丁亥周迪請降詔安成王
瑒督衆軍以招納之是歲周所立梁王蕭督死子歸代立

四年春正月丙子于陁利國遣使獻方物甲申周迪棄城走閩州刺史陳寶應納之臨川郡平壬辰以平

西將軍鄧州刺史章昭達爲護軍將軍仁武將軍新州刺史華皎進號平南將軍鎮南將軍開府儀同三司高州刺史黃法甌爲鎮北大將軍南徐州刺史安西將軍領臨川太守周敷爲南豫州刺史中護軍孫瑒爲鎮右將軍罷高州隸入江州二月戊戌征南將軍開府儀同三司廣州刺史歐陽頎進號征南大將軍庚戌以侍中司空征北大將軍侯安都爲征南大將軍江州刺史庚申以平南將軍華皎爲南湘州刺史三月辛未以鎮南將軍開府儀同三司徐度爲侍中中軍大將軍辛巳詔贈討周迪將士死王事者夏四月辛丑設無算大會於太極前殿乙卯以侍中中書監中衛將軍驃騎將軍揚州刺史安成王瑒爲開府儀同三司五月丁卯安前將軍右光祿大夫徐世譜卒六月癸巳太白晝見司空侯安都賜死七月丁丑以鎮北大將軍開府儀同三司南徐州刺史黃法甌爲鎮南大將軍江州刺史九月壬戌開府儀同三司廣州刺史歐陽頎薨癸亥曲赦京師辛未周迪復寇臨川詔護軍章昭達率衆討之十一月辛酉章昭達大破周迪悉擒其黨與迪脫身潛竄十二月丙申大赦天下詔護軍將軍章昭達進軍建安以討陳寶應信威將軍益州刺史余孝頃督會稽東陽臨海永嘉諸軍自東道會之癸丑以前安南將軍江州刺史吳明徹爲鎮前將軍

五年春正月庚辰以吏部尚書領右將軍袁樞爲丹陽尹辛巳輿駕親祀北郊乙酉江州溢城火燒死

者二百餘人三月丁丑以征南大將軍開府儀同三司桂州刺史涪州刺史爲中樞軍大將軍辛酉詔以
護軍將軍周鐵虎配食高祖廟庭夏四月庚子周遣使來聘五月庚午罷南丹陽郡是月周齊並遣使來
聘六月丁未夜有白氣兩道出于北斗東南屬地秋七月丁丑詔曰朕以寡昧屬當負重星躔亟改冤旒
弗曠不能仰協璿衡用調玉燭傍慰蒼生以安黔首兵無盜賊民乏有年移風之道未弘習俗之患猶在
致令氓多觸網吏繁筆削獄犴滋章雖由物犯囹圄淹滯亦或有寃念俾納隍載勞負戾加以膚濇不適
攝衛有虧比獲微痊思覃寬惠可曲赦京師九月城西城冬十一月丁亥以左衛將軍程靈洗爲中護軍
己丑章昭達破陳寶應于建安擒寶應留異送京師晉安郡平甲辰以護軍將軍章昭達爲鎮前將軍開
府儀同三司十二月甲子曲赦建安晉安二郡討陳寶應將士死王事者並給棺槨送還本鄉并復其家
瘡痍未瘳者給其醫藥癸未齊遣使來聘

六年春正月甲午皇太子加元服王公以下賜帛各有差孝悌力田爲父後者賜爵一級鰥寡孤獨不能
自存者穀人五斛庚戌以領軍將軍杜稜爲翊左將軍丹陽尹丹陽尹袁樞爲吏部尙書衛尉卿沈欽爲
中領軍三月乙未詔侯景以來遭亂移在建安晉安義安郡者並許還本土其被略爲奴婢者釋爲良民
夏四月甲寅以侍中中書監中衛將軍驃騎將軍開府儀同三司揚州刺史安成王瑒爲司空辛酉有彗

星見周遣使來聘秋七月癸未大風至自西南廣百餘步激壞靈臺候樓甲申儀賢堂無故自壞丙戌臨
川太守駱文牙斬周迪傳首京師梟於朱雀航丁酉太白晝見八月丁丑詔曰梁室多故禍亂相尋兵甲
紛紜十年不解不逞之徒虐流生氣無賴之屬暴及徂魂江左肇基王者攸宅金行水位之主水運火德
之君時更四代歲逾二百若其經綸三業縉紳民望忠臣孝子何世無才而零落山丘變移陵谷或皆剪
伐莫不侵殘玉杯得於民間漆簡傳於世載無復五株之樹罕見千年之表自大祚光啟恭惟揖讓爰暨
朕躬聿脩祖武雖復旂旗服色猶行杞宋之計每車駕巡遊眇瞻河雒之路故喬山之祀蘋藻弗虧驪山
之墳松柏恒守唯戚藩舊壘士子故塋掩殮未周樵牧猶衆或親屬流隸貢土無期子孫冥滅手植何寄
漢高留連於無忌宋祖惆悵於子房丘墓生哀性靈共惻者也朕所以興言永日思慰幽泉維前代王侯
自古忠烈墳冢被發絕無後者可檢行脩治墓中樹木勿得樵採庶幽顯咸暢聯意焉己卯立皇子伯
固爲新安郡王伯恭爲晉安王伯仁爲廬陵王伯義爲江夏王九月癸未罷豫章郡是月新作大航冬十
月辛亥齊遣使來聘十二月乙卯立皇子伯禮爲武陵王丁巳以鎮前將軍開府儀同三司章昭遠爲鎮
南將軍江州刺史鎮南大將軍江州刺史黃法甌爲中衛大將軍中護軍程靈洗爲宣毅將軍鄧州刺史
軍師將軍鄧州刺史沈恪爲中護軍鎮東將軍吳興太守吳明徹爲中領軍戊午以東中郎將吳郡太守

鄱陽王伯山爲平北將軍南徐州刺史癸亥詔曰朕自居民牧之重託在王公之上顧其寡昧鬱于治道加以屢虧聽覽事多壅積寃滯靡申幽枉弗鑒念茲罪戾有甚納隍而惠澤未流愆陽累月今歲序云暮元正向肇欲使幽圉之內同被時和可曲赦京師

天康元年春二月丙子詔曰朕以寡德纂承洪緒且昃劬勞思弘景業而政道多昧黎庶未康兼疹患淹時亢陽累月百姓何咎寔由朕躬念茲在茲痛如疾首可大赦天下改天嘉七年爲天康元年三月己卯以驃騎將軍開府儀同三司揚州刺史司空安成王頊爲尚書令夏四月乙卯皇孫至澤生在位文武賜絹帛各有差爲父後者賜爵一級癸酉世祖疾甚是日崩于有覺殿遺詔曰朕疾苦彌留遂至不救脩短有命夫復何言但王業艱難頻歲軍旅生民多弊無忘愧惕今方隅乃定俗教未弘便及大漸以爲遺恨社稷任重太子可卽君臨王侯將相善相輔翊內外協和勿違朕意山陵務存儉速大斂竟羣臣三日一臨公除之制率依舊典六月甲子羣臣上諡曰文皇帝廟號世祖丙寅葬永寧陵世祖起自艱難知百姓疾苦國家資用務從儉約常所調斂事不獲已者必咨嗟改色若在諸身主者奏決妙識真僞下不容姦人知自勵矣一夜內刺聞取外事分判者前後相續每雞人伺漏傳更籤於殿中乃敕送者必投籤於階石之上令鎗然有聲云吾雖眠亦令驚覺也始終梗槩若此者多焉

陳吏部尙書姚察曰世稱繼體守文宗枝承統得失之間蓋亦詳矣大抵以奉而勿墜爲賢能挽而易之爲不肖其有光揚前軌克荷曾構固以少焉世祖自初發跡功庸顯著寧亂靜寇首佐大業及國禍奄臻入承寶祚兢兢業業真若馭朽加以崇尚儒術愛悅文義見善如弗及用人如由己恭儉以御身勤勞以濟物自昔允文允武之君東征西怨之后賓實之迹可爲聯類至於杖聰明用鑒識斯則永平之政前史其論諸

陳書卷三考證

世祖紀著乃擒精辰宿降靈惟岳○擒一本作儲

設無尋大會於太極前殿○大會下南史有捨身二字

陳書卷三考證

陳書卷四

唐 散 騎 常 侍 姚 思 廉 撰

本紀第四

廢帝

廢帝諱伯宗字奉業小字藥王世祖嫡長子也梁承聖三年五月庚寅生永定二年二月戊辰拜臨川王世子三年世祖嗣位八月庚戌立爲皇太子自梁室亂離東宮焚燼太子居于永福省天康元年四月癸酉世祖崩其日太子卽皇帝位于太極前殿詔曰上天降禍大行皇帝奄棄萬國攀號靡及五內崩殞朕以寡德嗣膺寶命發覺在疚懼甚綴旒方賴宰輔匡其不逮可大赦天下又詔丙外文武各復其職遠方悉停奔赴五月乙卯尊皇太后曰太皇太后皇后曰皇太后庚寅以驃騎將軍司空揚州刺史新除尙書令安成王頊爲驃騎大將軍進位司徒錄尙書都督中外諸軍事丁酉中軍大將軍開府儀同三司徐度進位司空鎮南將軍開府儀同三司江州刺史章昭達爲侍中進號征南將軍鎮東將軍東揚州刺史始興王伯茂進號征東將軍開府儀同三司平北將軍南徐州刺史鄱陽王伯山進號鎮北將軍吏部尙書袁樞爲尙書左僕射雲磨將軍吳興太守沈欽爲尙書右僕射新除中領軍吳明徹爲領軍將軍新除中

護軍沈恪爲護軍將軍平南將軍湘州刺史華皎進號安南將軍散騎常侍御史中丞徐度爲吏部尙書
六月辛亥翊右將軍右光祿大夫王通進號安右將軍秋八月丁酉立妃王氏爲皇后冬十月庚申輿駕
奉祠太廟十一月乙亥周遣使來弔十二月甲子高麗國遣使獻方物

光大元年春正月癸酉尙書左僕射袁樞卒乙亥詔曰昔昊天成命降集寶圖二后重光九區咸乂閔余
沖薄王道未昭荷茲神器如涉靈海庶親賢並建牧伯惟良天下雍熙緬同刑措今三元改厯萬國充庭
清廟無追具俊斯在言瞻宁位觸感崩心思播遺恩俾覃黎獻可大赦天下改天康二年爲光大元年孝
悌力田賜爵一級己卯以領軍將軍吳明徹爲丹陽尹辛卯輿駕親祀南郊二月辛亥宣毅將軍南豫州
刺史余孝頃謀反伏誅癸丑以征東將軍開府儀同三司東揚州刺史始興王伯茂爲中衛大將軍開府
儀同三司黃法蕤爲鎮北將軍南徐州刺史鎮北將軍南徐州刺史鄱陽王伯山爲鎮東將軍東揚州刺
史三月甲午以尙書右僕射沈欽爲侍中尙書左僕射夏四月乙卯太白晝見五月癸巳以領軍將軍丹
陽尹吳明徹爲安南將軍湘州刺史乙未以鎮右將軍杜稜爲領軍將軍安南將軍湘州刺史華皎謀反
丙申以中撫大將軍瀆于量爲使持節征南大將軍總率舟師以討之六月壬寅以中軍大將軍司空徐
度進號車騎將軍總督京邑衆軍步道襲湘州閏月癸巳以雲麾將軍新安王伯固爲丹陽尹秋七月戊

申立皇子至澤爲皇太子賜天下爲父後者爵一級王公卿士已下資帛各有差九月乙巳詔曰逆賊
皎極惡窮凶遂樹立蕭歸謀危社稷棄親卽讐人神憤惋王師電速水陸爭前梟剪之期匪朝伊暮其家
口在北里尙方宜從誅戮用明國憲丙辰百濟國遣使獻方物是月周將長胡公拓跋定率步騎二萬入
鄧州與華皎水陸俱進都督渚于量吳明徹等與戰大破之皎單舸奔江陵擒拓跋定俘獲萬餘人馬四
千餘匹送京師冬十月辛巳赦湘巴二郡爲皎所誣誤者甲申與駕親祀太廟十一月己未以護軍將軍
沈恪爲平西將軍荊州刺史甲子侍中中權將軍開府儀同三司特進左光祿大夫王沖薨十二月庚寅
以兼從事中郎孔英哲爲奉聖亭侯奉孔子祀

二年春正月己亥侍中都督中外諸軍事驃騎大將軍司徒錄尙書揚州刺史安成王瑱進位太傅領司
徒加殊禮劍履上殿侍中征南將軍開府儀同三司江州刺史章昭達進號征南大將軍渚于量爲侍中
中軍大將軍開府儀同三司安南將軍湘州刺史吳明徹卽本號開府儀同三司進號鎮南將軍雲磨將
軍鄧州刺史程靈洗進號安西將軍庚子詔討華皎軍人死王事者並給棺槨送還本鄉仍復其家甲子
罷吳州以鄱陽郡還屬江州侍中空車騎將軍徐度薨夏四月辛巳太白晝見丁亥割東揚州管安郡
爲豐州五月丙辰太傅安成王瑱獻玉璽一六月丁卯彗星見秋七月丙午與駕親祀太廟戊申新羅國

遣使獻方物壬戌立皇弟伯智爲永陽王伯謀爲桂陽王九月甲辰林邑國遣使獻方物丙午狼牙脩國遣使獻方物以侍中征南大將軍開府儀同三司江州刺史章昭達爲中撫大將軍戊午太白晝見冬十月庚午輿駕親祀太廟十一月丙午以前平西將軍荊州刺史沈恪爲護軍將軍壬子以鎮北將軍開府儀同三司南徐州刺史黃法蕤爲鎮西將軍郢州刺史新除中軍大將軍開府儀同三司淳于量爲鎮北將軍南徐州刺史甲寅慈訓太后集羣臣於朝堂令曰中軍儀同鎮北儀同鎮右將軍護軍將軍八座卿士昔梁運季末海內沸騰天下蒼生殆無遺囑高祖武皇帝撥亂反正膺圖御籙重懸三象還補二儀世祖文皇帝克嗣洪基光宣寶業惠養中國綏靈外荒並戰戰兢兢劬勞締構庶幾鼎運方隆殷夏伯宗昔在儲宮本無令問及居崇極遂騁凶淫居處諒闇固不哀戚嬪嬙卍角就館相仍豈但依車所納是譏宗正衰經生子得謂右師七百之祚何憑三千之罪爲大且費引金帛令充椒闥內府中藏軍備國儲未盈葦稔皆已空竭太傅親承顧託鎮守宮闈遺誥縟繆義深垣屏而攢塗未御翌日無淹仍遣劉師知殷不佞等顯言排斥韓子高小豎輕佻推心委仗陰謀禍亂決起蕭牆元相雖持但除君側又以余孝頃密邇京師便相徵召殃厲之咎凶徒自擒宗社之靈祚氛是滅於是密詔華皎稱兵上流國祚憂惶幾移醜類乃至要招遠近叶力巴湘支黨縱橫寇擾黔歛又別敕歐陽紇等攻逼衡州嶺表紛紜殊淹眩望豈止罪

浮於昌邑非唯聲醜於太和但賊豎皆亡祿徒已散日望懲改猶加掩抑而悖禮忘德情性不悛樂禍思
亂昏厯無已張安國葢爾凶狡窮爲小盜仍遣使人蔣裕鈞出上京卽置行臺分選凶黨賊咬妻呂春徒
爲戮納自奚宮藏諸永巷使其結引親舊規圖戕禍邊主侯法喜等太傅磨下恆遊府朝唱以深利謀興
肘腋適又邊主孫秦等潛相連結大有交通兵力殊彊指期挺亂皇家有慶屢數遐長天誘其衷同然開
發此諸文迹今以相示是而可忍誰則不容祖宗基業將懼傾實豈可復肅恭禮祀臨御兆民式稽故實
宜在流放今可特降爲臨海郡王送還藩邸太傅安成王固天生德齊聖廣深二后鍾心三靈佇眷自前
朝不念任總邦家威惠相宣刑禮兼設指揮嘯咤湘郢廓清闢地開疆荆益風靡若太戊之承殷厯中都
之奉漢家校以功名曾何髣髴且地彰靈璽天表長誓布新除舊禎祥咸顯文皇知子之鑒事甚帝堯傳
弟之懷久符太伯今可還中曩志崇立賢君方固宗祧載貞辰象中外宜依舊典奉迎輿駕未亡人不幸
屬此殷憂不有崇替容危社稷何以拜祠高寢歸耐武園攬筆潛然兼懷悲慶是日出居別第太建二年
四月薨時年十九帝仁弱無人君之器世祖每慮不堪繼業旣居家嫡廢立事重是以依違積載及疾將
大漸召高宗謂曰吾欲遵太伯之事高宗初未達旨後寤乃拜伏涕泣固辭其後宣太后依詔廢帝焉
史臣曰臨海雖繼體之重仁厚懦弱混一是非不驚得喪蓋帝擊漢惠之流也世祖知神器之重諒難負

荷深鑿堯旨弗傳寶祚焉

康書卷四

唐 散 騎 常 侍 姚 思 廉 撰

本紀第五

宣帝

高宗孝宣皇帝諱瑱字紹世小字師利始興昭烈王第二子也梁大通二年七月辛酉生有赤光滿堂室少寬大多智略及長美容儀身長八尺三寸手垂過膝有勇力善騎射高祖平侯景鎮京口梁元帝徵高祖子姪入侍高祖遣高宗赴江陵累官爲直閣將軍中書侍郎時有馬軍主李總與高宗有舊每同遊處高宗嘗夜被酒張燈而寐總適出尋返乃見高宗身是大龍總便驚駭走避佗室及江陵陷高宗遷于關右永定元年遙襲封始興郡王邑二千戶三年世祖嗣位改封安成王天嘉三年自周還授侍中中書監中衛將軍置佐史尋授使持節都督揚南徐東揚南豫北江五州諸軍事揚州刺史進號驃騎將軍餘如故四年加開府儀同三司六年遷司空天康元年授尚書令餘並如故廢帝卽位拜司徒進號驃騎大將軍錄尚書都督中外諸軍事給班劍三十人光大二年正月進位太傅領司徒加殊禮劍履上殿增邑并前三千戶餘並如故十一月甲寅慈訓太后令廢帝爲臨海王以高宗入纂

太建元年春正月甲午卽皇帝位于太極前殿詔曰夫聖人受命王者中興並由懿德方作元后高祖武
皇帝揖拜堯圖經綸禹跡配天之業光辰象而利貞格地之功俾川岳而長遠世祖文皇帝體上聖之姿
當下武之運築宮示儉所務唯德定鼎初基厥謀斯在朕以寡薄才非聖賢夙荷前規方傳景祚雖復親
承訓誨志守蕃維詠季子之高風思城陽之遠託自元儲紹國正位君臨無道非幾佇闕刑措豈圖王室
不造頓謀亂階天步艱難將傾寶厯仰惟嘉命爰集朕躬我心貞確堅誓蒼昊而羣辟敢請相誼渭橋文
母尊嚴懸心長樂對揚璽紱非止殷湯之三辭履涉春冬何但代王之五讓今便肅奉天策欽承介圭若
據滄溟踰增兢業思所以雲行雨施品物咸亨當與黔黎普同斯慶可改光大三年爲太建元年大赦天
下在位文武賜位一階孝悌力田及爲父後者賜爵一級異等殊才並加策序蠲寡孤獨不能自存者人
賜穀五斛復太皇太后尊號曰皇太后立妃柳氏爲皇后世子叔寶爲皇太子皇子南中郎將江州刺史
康樂侯叔陵爲始興王奉昭烈王祀乙未輿駕謁太廟丁酉分命大使巡行四方觀省風俗征南大將軍
開府儀同三司新除中撫大將軍章昭達進號車騎大將軍新除中軍大將軍開府儀同三司南徐州刺
史湛子暹爲征北大將軍鎮北將軍開府儀同三司南徐州刺史新除鎮西將軍郢州刺史黃法甌進號
征西大將軍新除安南將軍開府儀同三司湘州刺史吳明徹進號鎮南將軍鎮東將軍揚州刺史鄱陽

王伯山進號中衛將軍尙書僕射沈欽爲尙書左僕射度支尙書王勣爲尙書右僕射護軍將軍沈恪爲鎮南將軍廣州刺史辛丑輿駕親祀南郊壬寅以皇子建安侯叔英爲宣惠將軍東揚州刺史改封豫章王豐城侯叔堅改封長沙王癸卯以明威將軍周弘正爲特進戊午輿駕親祀太廟二月庚午皇后謁太廟辛未皇太子謁太廟乙亥輿駕親耕籍田夏五月甲午齊遣使來聘丁巳以吏部尙書領大著作徐陵爲尙書右僕射太子詹事駙馬都尉沈君理爲吏部尙書秋七月辛卯皇太子納妃沈氏王公已下賜帛各有差丁酉以平東將軍吳郡太守晉安王伯恭爲中護軍進號安南將軍九月甲辰以新除中護軍晉安王伯恭爲中領軍冬十月新除左衛將軍歐陽紇據廣州舉兵反辛未遣車騎將軍開府儀同三司章昭達率衆討之壬午輿駕親祀太廟

二年春正月乙酉以征西大將軍開府儀同三司郢州刺史黃法蕤爲中權大將軍丙午輿駕親祀太廟二月癸未儀同章昭達擒歐陽紇送都斬于建康市廣州平三月丙申皇太后崩丙午曲赦廣衡二州丁未大赦天下又詔自討周迪華皎已來兵交之所有死亡者並命收斂并給棺槨送還本鄉瘡痍未瘳者各給醫藥夏四月乙卯臨海王伯宗薨戊寅皇太后祔葬萬安陵閏月戊申輿駕謁太廟己酉太白晝見五月乙卯儀同黃法蕤獻瑞璧一壬午齊遣使來弔六月戊子新羅國遣使獻方物辛卯大雨雹乙巳分

遣大使巡行州郡省理冤屈戊申車騎將軍開府儀同三司章昭遠進號車騎大將軍安南將軍廣州刺史沈恪進號鎮南將軍秋八月甲申詔曰懷遠以德抑惟恒典去戎卽華民之本志頃年江介繼負相隨崎嶇歸化亭候不絕宜加卹養答其誠心維是荒境自投有在都邑及諸州鎮不問遠近並蠲課役若克平舊土反我侵地皆許還鄉一無拘限州郡縣長明加甄別良田廢村隨便安處若輒有課訂卽以擾民論又詔曰民惟邦本著在典謨治國愛民抑又通訓朕聽朝晏罷日昃劬勞方流惠澤被億兆有梁之季政刑廢缺條綱弛紊僭盜荐興役賦征徭尤爲煩刻大陳御寓拯茲餘弊減扈戡黎弗追創改年代彌流將及成俗如弗解張物無與厝夕惕疚懷有同首疾思從卑菲約己濟民雖府帑未充君孰與足便可刪革去其泰甚冀永爲定准令簡而易從自今雜作田值水旱未收卽列在所言上折除軍士年登六十悉許放還巧手於役死亡及與老疾不勞訂補其籍有巧隱并王公百司輒受民爲程蔭解還本屬開恩聽首在職治事之身須通相檢示有失不推當局任罪令長代換具條解舍戶數付度後人戶有增進卽加擢賞若致減散依事准結有能墾起荒田不問頃畝多少依舊蠲稅戊子太白晝見九月乙丑以散騎常侍鎮東將軍吳興太守杜稜爲特進護軍將軍冬十月乙酉輿駕親祀太廟十一月辛酉高麗國遣使獻方物十二月癸巳夜西北有雷聲

三年春正月癸丑以尙書右僕射領大著作徐陵爲尙書僕射辛酉與駕親祀南太辛未親祀北太二月
辛巳與駕親祀明堂丁酉親耕籍田三月丁丑大赦天下自天康元年訖太建元年逋餘軍糧祿秩夏調
未入者悉原之又詔犯逆子弟支屬逃亡異境者悉聽歸首見繫繫者量可散釋其有居宅並追還夏四
月壬辰齊遣使來聘五月戊申太白晝見辛亥遼東新羅丹丹天竺盤盤等國並遣使獻方物六月丁亥
江陰王蕭季卿以罪免甲辰封東中郎將長沙王府諮議參軍蕭彝爲江陰王秋八月辛丑皇太子親釋
奠于太學二傳祭酒以下可資帛各有差九月癸酉太白晝見冬十月甲申與駕親祀太廟乙酉周遣使
來聘己亥丹丹國遣使獻方物十二月壬辰車騎大將軍司空章昭達薨

四年春正月丙午以雲麾將軍江州刺史始興王叔陵爲湘州刺史進號平南將軍東中郎將吳郡太守
長沙王叔堅爲宣毅將軍江州刺史尙書僕射領大著作徐陵爲尙書左僕射中書監王勣爲尙書右僕
射庚申以丹陽尹衡陽王伯信爲信威將軍中護軍庚午與駕親祀太廟二月乙酉立皇子叔卿爲建安
王授東中郎將東揚州刺史三月壬子以散騎常侍孫瑒爲安西將軍荊州刺史乙丑扶南林邑國並遣
使來獻方物夏四月戊子以中權大將軍開府儀同三司黃法甌爲征南大將軍南豫州刺史五月癸卯
尙書右僕射王勣卒六月辛巳侍中鎮右將軍右光祿大夫杜稜卒秋八月辛未周遣使來聘丁丑景雲

見戊寅詔曰國之大事受服興戎師出以律稟策於廟所以又安九有克成七德自頃掃滌羣穢廓清諸夏乃貔貅之戮力亦帷幄之運籌雖左衽已截干戈載戢呼韓來謁亭鄣無警但不教民戰是謂棄之仁必有勇無忘武備礮溪之傳韜訣穀城之授神符文叔懸制戎規孟德頗言兵略朕旣慙暗合良皆披覽兼昔經督戎備嘗行陳齊以七步肅之三鼓得自習襟指掌可述今並條制凡十三科宜卽班宣以爲永准乙未詔停督湘江二州逋租無錫等十五縣流民並蠲其繇賦秋九月庚子朔日有蝕之辛亥大赦天下又詔曰舉善從諫在上之明規進賢諷言爲臣之令範朕以寡德嗣守寶圖雖世襲隆平治非靈一辨方分職旰食早衣傍闕爭臣下無貢士何其闕爾鮮能抗直豈余獨運匪薦讜言置鼓公車罕論得失施石象魏莫陳可否朱雲摧檻良所不逢禽息觸楹又爲難值至如衣褐以見擔簦以遊或者艾絕倫或妙年異等干時而不偶右左莫之譽黑貂改弊黃金且殫終身滯淹可爲太息又貴爲百辟賤有十品工拙並驚勸沮莫分街謠徒擁廷議斯闕寔朕之弗明而時無獻替永言至治何迺爽歟外可通示文武凡厥在位風化乖殊朝政紕蠹正色直辭有犯無隱兼各舉所知隨才明試其蒞政廉穢在職能否分別矢言俟茲黜陟丙寅以故太尉徐度儀同杜稜儀同程靈洗配食高祖廟庭故車騎將軍章昭達配食世祖廟庭冬十月乙酉輿駕親祀太廟戊戌以鎮南將軍廣州刺史沈恪爲領軍將軍十月己亥夜地震閩月辛

未詔曰姑孰饒曠荆河斯擬博望關畿天限巖峻龍山南指牛渚北臨對熊繹之餘城邇全瓌之故壘良
疇美柘畦畎相望連宇高曠阡陌如繡自梁末兵災凋殘略盡比雖務優寬猶未克復咫尺封畿宜須殷
阜且眾將部下多寄上下軍民雜俗極爲蠹耗自今有罷任之徒許分留部下其已在江外亦令迎還悉
住南州津裏安置有無交貨不責市估菜荒墾闢亦停租稅臺遣鎮監一人共刺史津主分明檢押給地
賦田各立頓舍十二月壬寅甘露降樂遊苑甲辰輿駕幸樂遊苑採甘露宴羣臣丁卯詔曰梁氏之季兵
火荐臻承華焚蕩頓無遺構寶命惟新迄將二紀頻事戎旅未遑脩繕今工役差閑椽楹有擬來歲開肇
創築東宮可權置起部尙書將作大匠用主監作

五年春正月癸酉以征北大將軍開府儀同三司南徐州刺史淳于量爲中權大將軍宣惠將軍豫章王
叔英爲南徐州刺史進號平北將軍吏部尙書駙馬都尉沈君理爲尙書右僕射領吏部辛巳輿駕親祀
南郊甲午輿駕親祀太廟二月辛丑輿駕親祀明堂乙卯夜有白氣如虹自北方貫北斗紫宮三月壬午
分命衆軍北伐以鎮前將軍開府儀同三司吳明徹都督征討諸軍事丙戌西衡州獻馬生角己丑皇孫
胤生內外文武賜帛各有差爲父後者爵一級北討大都督吳明徹統衆十萬發自白下夏四月癸卯前
巴州刺史魯廣達克齊大峴城辛亥吳明徹克秦州水柵庚申齊遣兵十萬援歷陽儀同黃法氈破之辛

西齊軍救秦州吳明徹又破之癸亥詔北伐衆軍所殺齊兵並令埋掩甲子南譙太守徐懋克石梁城五月己巳石梁城降癸酉陽平郡城降甲戌徐懋克廬江郡城丙子黃法甌克歷陽城己卯北高唐郡城降辛巳詔征南大將軍開府儀同三司南豫州刺史黃法甌徙鎮歷陽齊改縣爲郡者並復之乙酉南齊昌太守黃詠克齊昌外城丙戌廬陵內史任忠軍次東關克其東西二城進克蘄城戊子又克譙郡城秦州城降癸巳瓜步胡墅二城降六月庚子郢州刺史李綜克滬口城乙巳任忠克合州外城庚戌淮陽沐陽郡並棄城走癸丑景雲見豫章內史程文季克涇州城乙卯宣毅司馬湛陔克新蔡城癸卯周遣使來聘黃法甌克合州城吳明徹師次仁州甲子克其州城是月治明堂秋七月乙丑鎮前將軍開府儀同三司吳明徹進號征北大將軍戊辰齊遣衆二萬援齊昌西陽太守周昞破之己巳吳明徹軍次峽口克其北岸城南岸守者棄城走周昞克巴州城淮北絳城及穀陽士民並誅其渠帥以城降丙戌吳明徹克壽陽外城八月乙未山陽城降壬寅盱眙城降戊申罷南齊昌郡壬子戎昭將軍徐敬辯克海安城青州東海城降戊午平固侯陳敬泰等克晉州城九月甲子陽平城降壬申高唐太守沈善度克馬頭城甲戌齊安城降丙子左衛將軍樊毅克廣陵楚子城癸未尙書右僕射領吏部駙馬都尉沈君理卒丁亥前鄆陽內史魯天念克黃城小城齊軍退保大城戊子割南兗州之盱眙郡屬譙州壬辰晦夜明黃城大城降冬十

月甲午郭默城降戊戌以中書令王瑒爲吏部尙書己亥以特進領國子祭酒周弘正爲尙書右僕射乙巳吳明徹克壽陽城斬王琳傳首京師梟子朱雀航丁未齊兵萬人至潁口樊毅擊走之辛亥齊遣兵援蒼陵又破之丙辰詔曰梁未得懸瓠以壽陽爲南豫州今者克復可還爲豫州以黃城爲司州治下爲安昌郡滄湍爲漢陽郡三城依梁爲義陽郡並屬司州以征北大將軍開府儀同三司吳明徹爲豫州刺史進號車騎大將軍征南大將軍開府儀同三司南豫州刺史黃法蕤爲征西大將軍合州刺史戊午湛暉克齊昌城十一月甲戌淮陰城降庚辰威虜將軍劉桃根克朐山城辛巳樊毅克濟陰城己丑魯廣達等克北徐州十二月壬辰朔詔曰古者反噬叛逆盡族誅夷所以藏其首級誠之後世比者所戮止在一身子胤或存臬懸自足不容久歸武庫長比月支惻隱之懷有仁不忍維熊曩朗留異陳寶應周迪鄧縉等及今者王琳首並還親屬以弘廣宥乙未譙城降乙巳立皇子叔明爲宜都王叔獻爲河東王壬午任忠克霍州城

六年春正月壬戌朔詔曰王者以四海爲家萬姓爲子一物乖方夕惕猶厲六合未混旰食彌憂朕嗣纂鴻基思弘經略上符景宿下叶人謀命將興師大拯淪溺灰琯未周凱捷相繼拓地數千連城將百蓋彼餘黎毒茲異境江淮年少猶有剽掠鄉閭無賴摘出陰私將帥軍人罔顧刑典今使苛法蠲除仁聲載路

且肇元告慶邊服來荒始覩皇風宜覃曲澤可赦江右淮南北司定霍光建朔合豫北徐仁北兗青冀南
譙南兗十五州郢州之齊安西陽江州之齊昌新蔡高唐南豫州之歷陽臨江郡土民罪無輕重悉皆原
宥將帥職司軍人犯法自依常科以翊前將軍新安王伯固爲中領軍進號安前將軍安前將軍中領軍
晉安王伯恭爲安南將軍南豫州刺史壬午輿駕親祀太廟甲申廣陵金城降周遣使來聘高麗國遣使
獻方物二月壬辰朔日有蝕之辛亥輿駕親耕籍田丙辰以中權大將軍開府儀同三司瀆于量爲征西
大將軍郢州刺史三月癸亥詔曰去歲南川頗言失稔所督田租于今未卽豫章等六郡太建五年田租
可申半至秋豫章又逋太建四年檢首田稅亦申至秋南康一郡嶺下應接民間尤弊太建四年田租未
入者可特原除庶脩墾無廢歲取方實夏四月庚子彗星見辛丑詔曰戢情懷善有國之令圖拯弊救危
聖範之通訓近命師薄伐義在濟民青齊舊隸膠光部落久患凶戎爭歸有道棄彼農桑忘其衣食而大
軍未接中途止憇胸山黃郭車營布滿扶老攜幼蓬流草跋旣喪其本業咸事遊手饑饉疾疫不免流離
可遣大使精加慰撫仍出陽平倉穀拯其懸磬并充糧種勸課士女隨近耕種石鼈等屯適意脩墾六月
壬辰尙書右僕射領國子祭酒周弘正卒乙巳以中衛將軍揚州刺史鄱陽王伯山爲征北將軍南徐州
刺史中護軍衡陽王伯信爲宣毅將軍揚州刺史冬十一月乙亥詔北討行軍之所並給復十年十二月

癸巳平南將軍湘州刺史始興王叔陵進號鎮南將軍戊戌以吏部尙書王瑒爲尙書右僕射度支尙書孔奐爲吏部尙書丙午安右將軍左光祿大夫王通加特進

七年春正月辛未輿駕親祀南郊乙亥左衛將軍樊毅克潼州城辛巳輿駕親祀北郊二月戊申樊毅克下邳高柵等六城三月辛未詔豫二竟譙徐合霍南司定九州及南豫江郢所部在江北諸郡置雲旗義士往大軍及諸鎮備防戊寅以新除征西大將軍合州刺史開府儀同三司黃法蕤爲豫州刺史改梁東徐州爲安州武州爲沅州移譙州鎮於新昌郡以秦郡屬之盱眙神農二郡還隸南兗州夏四月丙戌有星孛于大角庚寅監豫州陳桃根於所部得青牛獻之詔遣還民甲午輿駕親祀太廟乙未陳桃根又表上織成羅文錦被裘各二詔於雲龍門外焚之壬子郢州獻瑞鍾六五月乙卯割譙州之秦郡還隸南兗州分北譙縣置北譙郡領陽平所屬北譙西譙二縣合州之南梁郡隸入譙州六月丙戌爲北討將士死王事者克日舉哀壬辰以尙書右僕射王瑒爲尙書右僕射己酉改作雲龍神虎門秋八月壬寅移西陽郡治保城癸卯周遣使來聘閏九月壬辰都督吳明徹大破齊軍於呂梁是月甘露頻降樂遊苑丁未輿駕幸樂遊苑採甘露宴羣臣詔於苑龍舟山立甘露亭冬十月戊午以征北將軍南徐州刺史鄱陽王伯山爲征南將軍江州刺史安前將軍中領軍新安王伯固爲南徐州刺史進號鎮北將軍信威將軍江州

刺史長沙王叔堅爲雲麾將軍中領軍己巳立皇子叔齊爲新蔡王叔文爲晉熙王十一月庚戌以征西大將軍開府儀同三司郢州刺史湛于量爲中軍大將軍十二月丙辰以新除雲麾將軍郢州刺史長沙王叔堅爲平越中郎將廣州刺史東中郎將東揚州刺史建安王叔卿爲雲麾將軍鄧州刺史宣惠將軍宜都王叔明爲東揚州刺史壬戌以尙書僕射王瑒爲尙書左僕射太子詹事揚州大中正陸績爲尙書右僕射國子祭酒徐陵爲領軍將軍甲子南康郡獻瑞鍾

八年春正月庚辰西南有紫雲見二月壬申車騎大將軍開府儀同三司吳明徹進位司空丁丑詔江東道太建五年以前租稅夏調遣在民間者皆原之夏四月甲寅詔曰元戎凱旋羣師振旅旌功策賞宜有饗宴今月十七日可幸樂遊苑設絲竹之樂大會文武己未輿駕親祀太廟庚寅尙書左僕射王瑒卒六月癸丑以雲麾將軍廣州刺史長沙王叔堅爲合州刺史進號平北將軍甲寅以尙書右僕射陸績爲尙書左僕射新除晉陵太守王克爲尙書右僕射秋八月丁卯以車騎大將軍司空吳明徹爲南兗州刺史九月戊戌以皇子叔彪爲淮南王冬十一月乙酉以平南將軍湘州刺史長沙王叔堅爲平西將軍鄧州刺史丁酉分江州晉熙高唐新蔡三郡爲晉州辛丑以冠軍將軍廬陵王伯仁爲中領軍十二月丁卯以新除太子詹事徐陵爲右光祿大夫

九年春正月辛卯興駕親祀北郊壬寅以湘州刺史新除中衛將軍始興王叔陵爲揚州刺史雲麾將軍建安王叔卿爲湘州刺史進號平南將軍二月壬午興駕親耕籍田夏五月丙子詔曰朕昧旦求衣日旰方食思弘億兆用臻俾乂而牧守蒞民廉平未洽年常租賦多致逋餘卽此務農宜弘寬省可起太建以來詔八年流移叛戶所帶租調七年八年叛義丁五年詔八年叛軍丁六年七年逋租田米粟夏調綿絹絲石麥等五年詔七年逋賞絹皆悉原之秋七月乙亥以輕車將軍丹陽尹江夏王伯義爲合州刺史己卯百濟國遣使獻方物庚辰大雨震萬安陵華表己丑震慧日寺刹及瓦官寺重門一女子於門下震死冬十月戊午司空吳明徹破周將梁士彥衆數萬于呂梁十二月戊申東宮成皇太子移于新宮

十年春正月己巳朔以中領軍廬陵王伯仁爲平北將軍南徐州刺史翊左將軍右光祿大夫領太子詹事徐陵爲領軍將軍二月甲子北討衆軍敗績於呂梁司空吳明徹及將卒已下並爲周軍所獲三月辛未震武庫丙子分命衆軍以備周中軍大將軍開府儀同三司滄于量爲大都督總水陸諸軍事明威將軍孫瑒都督荆郢水陸諸軍事進號鎮西將軍左衛將軍樊毅爲大都督督朱沛清口上至荆山緣淮衆軍進號平北將軍武毅將軍任忠都督壽陽新蔡霍州等衆軍進號監遠將軍乙酉大赦天下丁酉以中軍大將軍開府儀同三司護軍將軍滄于量爲南兖州刺史進號車騎將軍夏四月庚戌詔曰懋賞之言

明於訓誥挾續之美著在撫巡近歲薄伐廓清淮泗摧鋒致果文武畢力櫛風沐雨寒暑亟離念功在茲無忘終食宜班榮賞用酬厥勞應在軍者可並賜爵二級并加賚卹付選卽便量處又詔曰惟堯萬衣鹿裘則天爲大伯禹弊衣菲食夫子曰無間然故儉德之恭約失者鮮朕君臨宇宙十變年箭旰日勿休乙夜忘寢政予思治若濟巨川念茲在茲懍同馭朽非貪四海之富非念黃屋之尊導仁壽以實羣生盜勞役以奉諸己但承梁季亂離斯瘼宮室禾黍有名亡處雖輪奐未覩頗事經營去泰去甚猶爲勞費加以戎車屢出千金日損府帑未充民疲征賦百姓不足君孰與足興言靜念夕惕懷抱垂訓立法良所多慙踟躕爲朴庶幾可慕雉頭之服旣焚弋絺之衣方襲損撤之制前自朕躬草偃風行冀以變俗應御府堂署所營造禮樂儀服軍器之外其餘悉皆停息掖庭常供王侯妃主諸有倖卹並各量減丁己以新除鎮右將軍新安王伯固爲護軍將軍戊午樊毅遣軍度淮北對清口築城庚申大雨雹壬戌清口城不守五月甲申太白晝見六月丁卯大雨震大皇寺刹莊嚴寺露盤重陽閣東樓千秋門內槐樹鴻臚府門秋七月戊戌新羅國遣使獻方物乙己以散騎常侍兼吏部尙書袁憲爲吏部尙書八月乙丑朔改秦郡爲義州戊寅隕霜殺稻菽九月壬寅以平北將軍樊毅爲中領軍乙己立方明壇于婁湖戊申以中衛將軍揚州刺史始興王叔陵兼王官伯臨盟甲寅輿駕幸婁湖臨誓乙卯分遣大使以盟誓班下四方上下相警

戒也壬戌以宣惠將軍江夏王伯義爲東揚州刺史冬十月戊寅罷義州及琅邪彭城二郡立建興鎮建安同夏烏山江乘臨沂湖熟等大縣屬揚州戊子以尙書左僕射陸縉爲尙書僕射十一月辛丑以鎮西將軍孫瑒爲郢州刺史十二月乙亥合州廬江蠻田伯興出寇樅陽刺史魯廣達討平之

十一年春正月丁酉龍見于南兖州永寧樓側池中二月癸亥輿駕親耕籍田三月丁未詔淮北義人率戶口歸國者建其本屬舊名置立郡縣卽隸近州賦給田宅喚訂一無所預五月乙巳詔曰昔軒轅命于風后力牧放勛咨爾稷契朱虎冕旒垂拱化致隆平爰逮漢列五曹周分六職設官理務各有攸司亦幾期刑措卜世彌永並賴羣才用康庶績朕日昃劬勞思弘治要而機事尙擁政道未凝夕惕于懷罔知攸濟方欲仗茲舟楫委成股肱徵名責實取靈多士自今應尙書曹府寺內省監司文案悉付局參議分判其軍國興造徵發選序三獄等事前須詳斷然後啟聞凡諸辯決務令清又約法守制較若畫一不得前後舛互自相矛盾致有枉滯紆意舞文糾聽所知靡有攸赦甲寅詔曰舊律以枉法受財爲坐雖重直法容賄其制甚輕豈不長彼貪殘生其舞弄事涉貨財靈不允切今可改不枉法受財者科同正盜六月庚辰以鎮前將軍豫章王叔英爲鎮南將軍江州刺史丙戌以征南將軍江州刺史鄱陽王伯山爲中權將軍護軍將軍秋七月辛卯初用大貨六銖錢八月甲子青州義主朱顯宗等率所領七百戶入附丁卯與

駕幸大壯觀閱武戍輿駕還宮冬十月甲戌以安前將軍祠部尙書晉安王伯恭爲軍師將軍尙書僕射陸績爲尙書左僕射十一月辛卯詔曰晝冠弗犯革此澆風孥戮是陷化於薄俗朕肅膺寶命迄將一紀思經邦濟治憂國愛民日昃劬勞夜分輟寢而還澹反朴其道靡階雍熙盛美莫云能致遂乃鞫訊之牒盈於聽覽春欽之人煩於牢狴周成刑措漢文斷獄杼軸空勞邈焉旣遠加以萑爾醜徒軼我彭汴淮汝氓庶企踵王略治兵誓旌義存拯救飛芻挽粟征賦頗煩暑雨祁寒寔忘咨怨兼宿度乖舛次舍違方若日之誠責歸元首愧心斯積馭朽非懼卽建子令月微陽初動應此嘉辰宜播寬澤可大赦天下甲午周遣柱國梁士彥率衆至肥口戊戌周軍進圍壽陽辛丑以車騎將軍開府儀同三司南兗州刺史湛于量爲上流水軍都督中領軍樊毅都督北討諸軍事加安北將軍散騎常侍左衛將軍任忠都督北討諸軍事加平北將軍前豐州刺史臯文奏率步騎三千趣陽平郡癸卯任忠率步騎七千趣秦郡丙午新除仁威將軍右衛將軍魯廣達率衆入淮是日樊毅領水軍二萬自東關入焦湖武毅將軍蕭摩訶率步騎趣歷陽戊申豫州陷辛亥霍州又陷癸丑以新除中衛大將軍揚州刺史始興王叔陵爲大都督總督水步衆軍十二月乙丑南北兗晉三州及盱眙山陽陽平馬頭秦歷陽沛北譙南梁等九州並自拔還京師譙北徐州又陷自是淮南之地盡沒于周矣己巳詔曰昔堯舜在上茅屋土階湯禹爲君藜杖草帶至如

甲帳珠絡華樓璧璫未能雍熙徒聞侈欲朕企仰前聖思求訟平正道多違瀛風又靡至今貴里豪家金鋪玉鳥貧居陋巷彘食牛衣稱物平施何其遼遠燼烽未息役賦兼勞文吏姦貪妄動科格重以旗亭關市稅斂繁多不廣都內之錢非供水衡之費逼遏商賈營謀私蓄靖懷衆弊宜事改張弗弘王道安拯民靈今可宣勅主衣尙方諸堂署等自非軍國資須不得繕造衆物後宮僚列若有游長掖庭啟奏卽皆量遣太子祕戲非會禮經樂府倡優不合雅正竝可刪改市估津稅軍令國章更須詳定唯務平允別觀離宮郊間野外非恆饗宴勿復脩治并勅内外文武車馬宅舍皆循儉約勿尙奢華違我嚴規抑有刑憲所由具爲條格標榜宣示令喻朕心焉癸酉遣平北將軍沈恪電威將軍裴子烈鎮南徐州開遠將軍徐道奴鎮柵口前信州刺史楊寶安鎮白下戊寅以中領軍樊毅爲鎮西將軍都督荆郢巴武四州水陸諸軍事

十二年春正月戊戌以散騎常侍左衛將軍任忠爲平南將軍南豫州刺史督緣江軍防事三月壬辰以平北將軍廬陵王伯仁爲翊左將軍中領軍夏四月癸亥尙書左僕射陸縉卒乙丑以宣毅將軍河東王叔獻爲南徐州刺史己卯大雪壬午雨五月癸巳以軍師將軍尙書右僕射晉安王伯恭爲尙書僕射六月壬戌大風壞臯門中闕秋八月己夫周使持節上柱國鄭州總管滎陽郡公司馬消難以鄭隨溫應土

順沔假岳等九州魯山甌山沌陽應城平靖武陽上明涓水等八鎮內附詔以涓難爲使持節侍中大都督總督安隨等九州八鎮諸軍事車騎將軍司空封隨郡公給鼓吹女樂各一部庚申詔鎮西將軍樊毅進督沔漢諸軍事遣平南將軍豫州刺史任忠率衆趣歷陽通直散騎常侍超武將軍陳慧紀爲前軍都督趣南兗州戊辰以新除司空馬涓難爲大都督水陸諸軍事庚午通直散騎常侍涓于陵克臨江郡癸酉智武將軍魯廣達克郭默城甲戌大雨霖丙子涓于陵克祐州城九月癸未周臨江太守劉顯光率衆內附是夜天東南有聲如風水相擊三夜乃止丙戌改安陸郡爲南司州丁亥周將王廷貴率衆援歷陽任忠擊破之生擒廷貴等己酉周廣陵義主曹藥率衆入附冬十月癸丑大雨霍震十一月己丑詔曰朕君臨四海日旰劬勞思弘至治未臻斯道而兵車驟出軍費尤煩獨漕控引不能徵賦夏中亢旱傷農畿內爲甚民失所資歲取無託此則政刑未理陰陽舛度黎元阻饑君孰與足靖言興念余責在躬宜布惠澤溥沾氓庶其丹陽吳興管陵建興義興東海信義陳留江陵等十郡并謝誓卽年田稅祿秩並各原半其丁租半申至來歲秋登十二月庚辰宣毅將軍南徐州刺史河東王叔獻薨

十三年春正月壬午以車騎將軍開府儀同三司涓于量爲左光祿大夫中權將軍護軍將軍鄱陽王伯山卽本號開府儀同三司鎮右將軍國子祭酒新安王伯固爲揚州刺史軍師將軍尙書僕射晉安王伯

恭爲尙書左僕射右將軍丹陽尹徐陵爲中書監領太子詹事吏部尙書袁憲爲尙書右僕射庚寅以輕
車將軍衛尉卿宜都王叔明爲南徐州刺史二月甲寅詔賜司馬消難所部周大將軍田廣等封爵各有
差乙亥與駕親耕籍田夏四月乙巳分衡州始興郡爲東衡州衡州爲西衡州五月丙辰以前鎮西將軍
樊毅爲中護軍六月辛卯以新除中護軍樊毅爲護軍將軍秋九月癸亥夜大風至自西北發屋拔樹大
雷震雹冬十月癸未以散騎常侍丹陽尹毛喜爲吏部尙書護軍將軍樊毅爲鎮西將軍荊州刺史改鄧
陽郡爲吳州壬寅丹丹國遣使獻方物十二月辛巳彗星見己亥以翊右將軍衛尉卿沈恪爲護軍將軍
十四年春正月己酉高宗弗豫甲寅崩于宣福殿時年五十三遺詔曰朕爰自遘疾會未浹旬醫藥不瘳
便屬大漸終始定分夫復奚言但君臨寰宇十有四載誠則雖休勿休日慎一日知宗廟之負重識王業
之艱難而邊鄙多虞生民未乂方欲蕩清四海包吞八荒有志莫從遺恨幽壤皇太子叔寶繼體正嫡年
業韶茂纂統洪基社稷有主羣公卿士文武內外俱罄心力同竭股肱送往事居盡忠誠之節當官奉職
弘翼亮之功務在叶和無違朕意凡厥終制事從省約金銀之飾不須入壙明器之具皆令用瓦唯使儉
而合禮勿得奢而乖度以日易月既有通規公除之制悉依舊制在位百司三日一臨四方州鎮五等諸
侯各守所職並停奔赴二月辛卯上諡孝宣皇帝廟號高宗癸巳葬顯靈陵高宗在田之日有大度幹略

及乎登庸寔允天人之望梁室喪亂淮南地並入齊高宗太建初志復舊境乃運神略授律出師至於戰勝攻取獻捷相繼遂獲反侵地功實懋焉及周滅齊乘勝略地還達江際矣

史臣曰高宗器度弘厚亦有人君之量焉世祖知冢嗣仁弱弗可傳於寶位高宗地居姬旦世祖情存太伯及平弗念大事咸悉焉至於纂業萬機平理命將出師克淮南之地開拓土宇靜謐封疆享國十餘年志大意逸呂梁覆軍大喪師徒矣江左削弱抑此之由嗚呼蓋德不逮文智不及武雖得失自我無禦敵之略焉

陳書卷五考證

宣帝紀梁大通二年七月辛酉生○大通南史作中大通

時有馬軍主李總與高宗有舊○南史無馬字

十月己亥夜地震○

臣人龍

按上文書冬十月乙酉祀太廟戊戌以沈恪爲領軍則此不應複書十月若

南史作十一月而不書朔以上戊戌證之亦恐有誤

分命衆軍北伐○南史云是歲諸軍略地所在尅捷與下文詳叙者小異

壬辰以尙書右僕射王瑒爲尙書右僕射○下右字衍

臣人龍

按南史云以尙書右僕射爲尙書僕射則

知右字之爲衍文矣

己酉周廣陵義主曹藥率衆入附○南史主字上有軍字

陳書卷五考證

陳書卷六

唐 散 騎 常 侍 姚 思 廉 撰

本紀第六

後主

後主諱叔寶字元秀小字黃奴高宗嫡長子也梁承聖二年十一月戊寅生于江陵明年江陵陷高宗遷關右留後主于縵城天嘉三年歸京師立爲安成王世子天康元年授盩遠將軍置佐史光大二年爲太子中庶子尋遷侍中餘如故太建元年正月甲午立爲皇太子十四年正月甲寅高祖崩乙卯始興王叔陵作逆伏誅丁巳太子卽皇帝位于太極前殿詔曰上天降禍大行皇帝奄棄萬國攀號擗踊無所追及朕以哀聲嗣膺寶厯若涉巨川罔知攸濟方賴羣公用匡寡薄思播遺德覃被億兆凡厥遐邇咸與惟新可大赦天下在位文武及孝悌力田爲父後者並賜爵一級孤老鰥寡不能自存者賜穀人五斛帛二匹癸亥以侍中翊前將軍丹陽尹長沙王叔堅爲驃騎將軍開府儀同三司揚州刺史右衛將軍蕭摩訶爲車騎將軍南徐州刺史鎮西將軍荊州刺史樊毅進號征西將軍平南將軍豫州刺史任忠進號鎮南將軍護軍將軍沈恪爲特進金紫光祿大夫平西將軍魯廣達進號安西將軍仁武將軍豐州刺史章大寶

爲中護軍乙丑尊皇后爲皇太后宮曰弘範丙寅以冠軍將軍晉熙王叔文爲宣惠將軍丹陽尹丁卯立弟叔重爲始興王奉昭烈王祀己巳立妃沈氏爲皇后辛未立皇弟叔儼爲尋陽王皇弟叔慎爲岳陽王皇弟叔達爲義陽王皇弟叔熊爲巴山王皇弟叔虞爲武昌王壬申侍中中權將軍開府儀同三司鄧陽王伯山進號中權大將軍軍師將軍尙書左僕射晉安王伯恭進號翊前將軍侍中翊右將軍中領軍盧陵王伯仁進號安前將軍鎮南將軍江州刺史豫章王叔英進號征南將軍平南將軍湘州刺史建安王叔卿進號安南將軍以侍中中書監安右將軍徐陵爲左光祿大夫領太子少傅甲戌設無尋大會於太極前殿三月辛亥詔曰躬推爲勸義顯前經力農見賞事昭往誥斯乃國儲是資民命攸屬豐儉隆替靡不由之夫入賦自古輸彙惟舊沃饒貴于十金磽确至於三易腴墉旣異盈縮不同詐僞日興簿書歲改稻田使者著自西京不實峻刑聞諸東漢老農懼於祇應俗吏因而侮文輟耒成羣游手爲伍永言妨蠶良可太息今陽和在節膏澤潤下宜展春耨以望秋坻其有新闢墾畝進墾蒿萊廣袤勿得度量征租悉皆停免私業久廢咸許占作公田荒縱亦隨肆勤儻良守教耕瀆民載酒有茲督課議以賞擢外可爲格班下稱朕意焉癸亥詔曰夫體國經野長世字氓雖因革儻殊弛張或異至於旁求俊乂爰逮側微用道和藹是隆大廈上智中主咸由此術朕以寡薄嗣膺景祚雖哀疚在躬情慮愔外而宗社任重黎庶務殷

無由自安拱默敢忘康濟思所以登顯髦彥式備周行但空勞宵夢屢勤史卜五就莫來五能不至是用甲旦凝慮丙夜損懷豈以食玉炊桂無因自達將懷寶迷邦咸思獨善應內外眾官九品已上可各薦一人以會彙征之旨且取備實難舉長或易小大之用明言所施勿得南箕北斗名而非實其有負能仗氣擯壓當時著賓戲以自憐草客嘲以慰志人生一世逢遇誠難亦宜去此幽谷翔茲天路趨銅駝以觀國望金馬而來庭便當隨彼方圓飭之矩矱又詔曰昔睿后宰民哲王御寓雖德稱汪濊明能普燭猶復紆己乞言降情訪道高咨岳牧下聽輿臺故能政若神明事無悔吝朕纂承丕緒思隆大業常懼九重已鑿四聽未廣欲聽昌言不疲痺足若逢廷折無憚批鱗而口柔之辭儻聞於在位腹誹之意或隱於具僚非所以弘理至公緝熙帝載者也內外卿士文武眾司若有智周政術心練治體救民俗之疾苦辯禁網之疎密者各進忠讜無所隱諱朕將虛己聽受擇善而行庶深鑒物情匡我王度己已以待中尙書左僕射新除翊前將軍晉安王伯恭爲安南將軍湘州刺史新除翊左將軍永陽王伯智爲尙書僕射中護軍章大寶爲豐州刺史夏四月丙申立皇子永康公胤爲皇太子賜天下爲父後者爵一級王公已下賚帛各有差庚子詔曰朕臨御區宇撫育黔黎方欲康濟薄蠲省繁費奢僭乖衷實宜防斷應鏤金銀薄及庶物化生土木人綵花之屬及布帛幅尺短狹輕疎者並傷財廢業尤成蠹患又僧尼道士挾邪左道不依

經律民聞淫祀祇書諸珍怪事詳爲條制並皆禁絕癸卯詔曰中歲克定淮泗爰涉青徐彼土酋豪並輸
聲誠款分遣親戚以爲質任今舊土淪陷復成異域南北阻遠未得會同念其分乖殊有愛戀夷狄吾民
斯事一也何獨譏禁使彼離析外可卽檢任子館及東館并帶保任在外者並賜衣糧頒之酒食遂其鄉
路所之阻遠便發遣船仗衛送必令安達若己預仕宦及別有事議不欲去者亦隨其意六月癸酉朔以
明威將軍通直散騎常侍孫瑒爲中護軍秋七月辛未大赦天下是月江水色赤如血自京師至于荊州
八月癸未夜天有聲如風水相擊乙酉夜亦如之丙戌以使持節都督緣江諸軍事安西將軍魯廣達爲
安左將軍九月丙午設無尋大會於太極殿捨身及乘輿御服大赦天下辛亥夜天東北有聲如蟲飛漸
移西北乙卯太白晝見丙寅以驃騎將軍開府儀同三司揚州刺史長沙王叔堅爲司空征南將軍江州
刺史豫章王叔英卽本號開府儀同三司

至德元年春正月壬寅詔曰朕以寡薄嗣守鴻基哀惇切慮疹恙纏織訓俗少方臨下靡算懼甚踐冰慄
同馭朽而四氣易流三光過至纒絃列陛玉帛充庭具物匪新節序疑舊緬思前德永慕昔辰對軒闕而
哽心顧展筵而慄氣思所以仰遵遺構俯勵薄躬陶鑄九流休息百姓用弘寬簡取叶陽和可大赦天下
改太建十五年爲至德元年以征南將軍江州刺史新除開府儀同三司豫章王叔英爲中衛大將軍驃

騎將軍開府儀同三司揚州刺史長沙王叔堅爲江州刺史征東將軍開府儀同三司東揚州刺史司馬
消難進號車騎將軍宣惠將軍丹陽尹晉熙王叔文爲揚州刺史鎮南將軍南豫州刺史任忠爲領軍將
軍安左將軍魯廣達爲平南將軍南豫州刺史祠部尙書江總爲吏部尙書癸卯立皇子深爲始安王二
月丁丑以始興王叔重爲揚州刺史夏四月戊辰交州刺史李幼榮獻馴象己丑以前輕車將軍揚州刺
史晉熙王叔文爲江州刺史秋八月丁卯以驃騎將軍開府儀同三司長沙王叔堅爲司空九月丁巳天
東南有聲如蟲飛冬十月丁酉立皇弟叔平爲湘東王叔敖爲臨賀王叔宣爲陽山王叔穆爲西陽王戊
戌侍中安右將軍左光祿大夫太子少傅徐陵卒癸丑立皇弟叔儉爲南安王叔澄爲南郡王叔興爲沅
陵王叔韶爲岳山王叔純爲新興王十二月丙辰頭和國遣使獻方物司空長沙王叔堅有罪免戊午夜
天開自西北至東南其內有青黃色隆隆若雷聲

二年春正月丁卯分遣大使巡省風俗平南將軍豫州刺史魯廣達進號安南將軍癸巳大赦天下夏五
月戊子以尙書僕射承陽王伯智爲平東將軍東揚州刺史輕車將軍江州刺史晉熙王叔文爲信威將
軍湘州刺史仁威將軍揚州刺史始興王叔重爲江州刺史信武將軍南琅邪彭城二郡太守南平王嶷
爲揚州刺史吏部尙書江總爲尙書僕射秋七月戊辰以長沙王叔堅爲侍中鎮左將軍壬午太子加元

服在位文武賜帛各有差孝悌力田爲父後者各賜一級饒寡癯老不能自存者人穀五斛九月癸未太白晝見冬十月己酉詔曰耕鑿自足乃曰瀟風貢賦之興其來尙矣蓋由庚亟務不獲已而行焉但法令滋章姦盜多有俗尙澆詐政鮮惟良朕日旰夜分矜一物之失所泣辜罪己愧三千之未措望訂初下使疆隍兼出如聞貧富均起單弱重弊斯豈振窮屬暵之意歟是乃下吏箕歛之苛也故云百姓不足君孰與足自太建十四年望訂租調逋未入者並悉原除在事百僚辯斷庶務必去取平允無得便公害民爲己聲績妨紊政道十一月丙寅大赦天下壬申盤盤國遣使獻方物戊寅百濟國遣使獻方物

三年春正月戊午朔日有蝕之庚午以鎮左將軍長沙王叔堅卽本號開府儀同三司征西將軍荊州刺史樊毅爲護軍將軍守吏部尙書領著作陸瓊爲吏部尙書金紫光祿大夫袁敬加特進三月辛酉前豐州刺史章大寶舉兵反夏四月庚戌豐州義軍主陳景詳斬大寶傳首京師秋八月戊子夜老人星見己酉以左民尙書謝伸爲吏部尙書九月甲戌特進金紫光祿大夫袁敬卒冬十月己丑丹國遣使獻方物十一月己未詔曰宣尼誕膺上哲體資至聖祖述憲章之典並天地而合德樂正雅頌之奧與日月而偕明垂後昆之訓範開生民之耳目梁季湮微靈寢忘處鞠爲茂草三十餘年敬仰如在永惟愾息今雅道雍熙由庚得所斷琴故履零落不追閔筭開書無因循復外可詳之禮典改築舊廟憲房桂棟咸使惟

新芳彙潔瘴以時鸞奠辛巳輿駕幸長干寺大赦天下十二月丙戌太白晝見辛卯皇太子出太學講孝經戊戌講畢辛丑釋奠于先師禮畢設金石之樂會宴王公卿士癸卯高麗國遣使獻方物是歲蕭歸死子琮代立

四年春正月甲寅詔曰堯施諫鼓禹拜昌言求之異等久著前徽舉以淹滯復聞昔典斯乃治道之深規帝王之切務朕以寡昧丕承鴻緒未明虛己日旰興懷萬機多紊四聰弗達思聞蹇諤採其謀計王公已下各薦所知旁詢管庫爰及輿阜一介有能片言可用朕親加聽覽佇於啟沃中樞大將軍開府儀同三司鄱陽王伯山進號鎮衛將軍中衛大將軍開府儀同三司豫章王叔英進號驃騎大將軍鎮左將軍開府儀同三司長沙王叔堅進號中軍大將軍安南將軍晉安王伯恭進號鎮右將軍翊右將軍宜都王叔明進號安右將軍二月丙戌以鎮右將軍晉安王伯恭爲特進丙申立皇弟叔謨爲巴東王叔顯爲臨江王叔坦爲新會王叔隆爲新寧王夏五月丁巳立皇子莊爲會稽王秋九月甲午輿駕幸玄武湖肄艦艦闕武宴羣臣賦詩戊戌以鎮衛將軍開府儀同三司鄱陽王伯山爲東揚州刺史智武將軍岳陽王叔慎爲丹陽尹丁未百濟國遣使獻方物冬十月癸亥尙書僕射江總爲尙書令吏部尙書謝仲爲尙書僕射十一月己卯詔曰惟刑止暴惟德成物三才是資百王不改而世無抵角時鮮犯鱗渭橋驚馬弗聞廷爭

桃林逸牛未見其旨雖剽悍輕侮理從鉗鋏蠢愚杜默宜肆矜弘政乏良哉明愍則哲求諸刑措安可得乎是用屬寤寐以軫懷負黼屨而於邑復茲合璧輪缺連珠緯舛黃鍾獻呂和氣始萌玄英告中履長在御因時宥過抑乃斯得可大赦天下

禎明元年春正月丙子以安前將軍衡陽王伯信進號鎮前將軍安東將軍吳興太守廬陵王伯仁爲特進智武將軍丹陽尹岳陽王叔慎爲湘州刺史仁武將軍義陽王叔達爲丹陽尹戊寅詔曰栢皇大庭鼓溘和於曩日姬王嬴后被澆風於末載刑書已鑄善化匪融禮義旣乖姦宄斯在何其溘朴不反浮華競屬者歎朕居中御物納隍在睽頻恢天網屢絕三邊元元黔庶終罹五辟蓋乃康哉寡薄抑焉法令滋章是用當宁弗怡矜此向隅之意今三元具序萬國朝辰靈芝獻於始陽膏露凝於聿歲從春施令仰乾布德思與九有惟新七政可大赦天下改至德五年爲禎明元年乙未地震癸卯以鎮前將軍衡陽王伯信爲鎮南將軍西衡州刺史二月丁未以特進鎮右將軍晉安王伯恭進號中衛將軍中書令建安王叔卿爲中書監丁卯詔至德元年望訂租調逋未入者並原之秋八月癸卯老人星見丁未以車騎將軍蕭摩訶爲驃騎將軍九月乙亥以驃騎將軍開府儀同三司豫章王叔英爲驃騎大將軍庚寅蕭瑒所署尙書令太傅安平王蕭巖中軍將軍荊州刺史義興王蕭翬遣其都官尙書沈君公詣荊州刺史陳紀請降辛

卯巖等率文武男女十萬餘口濟江甲午大赦天下冬十一月乙亥割揚州吳郡置吳州割錢塘縣爲郡屬焉丙子以蕭巖爲平東將軍開府儀同三司東揚州刺史蕭瓛爲安東將軍吳州刺史丁亥以驃騎大將軍開府儀同三司豫章王叔英兼司徒十二月丙辰以前鎮衛將軍開府儀同三司東揚州刺史鄧陽王伯山爲鎮衛大將軍開府儀同三司前中衛將軍晉安王伯恭爲中衛將軍右光祿大夫

二年春正月辛巳立皇子恮爲東陽王恬爲錢塘王是月遣散騎常侍周羅暉帥兵屯峽口夏四月戊申有羣鼠無數自蔡洲岸入石頭渡淮至于青塘兩岸數日死隨流出江戊午以左民尙書蔡徵爲吏部尙書是月郢州南浦水黑如墨五月壬午以安前將軍廬陵王伯仁爲特進甲午東冶鑄鐵有物赤色如數斗自天墜鎔所有聲隆隆如雷鐵飛出牆外燒民家六月戊戌扶南國遣使獻方物庚子廢皇太子詹爲吳興王立軍師將軍揚州刺史始安王深爲皇太子辛丑平南將軍江州刺史南平王嶷進號鎮南將軍忠武將軍南徐州刺史永嘉王彥進號安北將軍會稽王莊爲翊前將軍揚州刺史宣惠將軍尙書令江總進號中權將軍雲麾將軍太子詹事袁憲爲尙書僕射尙書僕射謝佾爲特進靈遠將軍新除吏部尙書蔡徵進號安右將軍甲辰以安右將軍魯廣達爲中領軍丁巳大風至自西北激濤水入石頭城淮渚暴溢漂沒舟乘冬十月己亥立皇子蕃爲吳郡王辛丑以度支尙書領大著作姚察爲吏部尙書己酉興

駕幸莫府山大校獵十一月丁卯詔曰夫議獄緩刑皇王之所垂範勝殘去殺仁人之所用心自晝冠既
息刻吏斯起法令滋章手足無措朕君臨區宇屬當澆末輕重之典在政未康小大之情興言多愧眷茲
狴狴有軫哀矜可克日於大政殿訊獄壬申以鎮南將軍江州刺史南平王嶷爲征西將軍鄧州刺史安
北將軍南徐州刺史永嘉王彥爲安南將軍江州刺史軍師將軍南海王虔爲安北將軍南徐州刺史丙
子立皇弟叔榮爲新昌王叔匡爲太原王是月隋遣晉王廣衆軍來伐自巴蜀沔漢下流至廣陵數十道
俱入緣江鎮戍相繼奏聞時新除湘州刺史施文慶中書舍人沈客卿掌機密用事並抑而不言故無備
禦

三年春正月乙丑朔霧氣四塞是日隋總管賀若弼自北道廣陵濟京口總管韓擒虎趣橫江濟采石自
南道將會弼軍丙寅采石戍主徐子建馳啟告變丁卯召公卿入議軍放戊辰內外戒嚴以驃騎將軍蕭
摩訶護軍將軍樊毅中領軍魯廣達並爲都督遣南豫州刺史樊猛帥舟師出白下散騎常侍旱文奏將
兵鎮南豫州庚午賀若弼攻陷南徐州辛未韓擒虎又陷南豫州文奏敗還至是隋軍南北道並進後主
遣驃騎大將軍司徒豫章王叔英屯朝室蕭摩訶屯樂遊苑樊毅屯耆闍寺魯廣達屯白土岡忠武將軍
孔範屯寶田寺己卯鎮東大將軍任忠自吳興入赴仍屯朱雀門辛巳賀若弼進據鍾山頓白土岡之東

南甲申後主遣衆軍與弼合戰衆軍敗績弼乘勝至樂遊苑魯廣達猶督散兵力戰不能拒弼進攻宮城燒北掖門是時韓擒虎率衆自新林至于石子岡任忠出降於擒虎仍引擒虎經朱雀航趣宮城自南掖門而入於是城內文武百司皆遁出唯尙書僕射袁憲在殿內尙書令江總吏部尙書姚察度支尙書袁樞前度支尙書王琰侍中王寬在省中後主聞兵至從宮人十餘出後堂景陽殿將自投于井袁憲侍側苦諫不從後閤會人夏侯公韻又以身蔽井後主與爭久之方得入焉及夜爲隋軍所執丙戌晉王廣入據京城三月己巳後主與王公百司發自建業入于長安隋仁壽四年十一月壬子薨於洛陽時年五十二追贈大將軍封長城縣公諡曰煬葬河南洛陽之芒山

史臣侍中鄭國公魏徵曰高祖拔起傭畝有雄桀之姿始佐下藩奮英奇之略弭節南海職思靜亂援旗北邁義在勤王埒侯景於旣成拯梁害於已墜天網絕而復續國步屯而更康百神有主不失舊物魏王之延漢鼎祚宋武之反晉乘輿懋績鴻勳無以尙也于時內難未弭外隣勍敵王琳作梗於上沈周齊搖蕩於江漢畏首畏尾若存若亡此之不圖遠移天祿雖皇靈有睠何其速也然志度弘遠懷抱豁如或取士於仇讎或擢才於亡命掩其受金之過宥其吠堯之罪委以心腹爪牙咸能得其死力故乃決機百勝成此三分方諸鼎峙之雄足以無敵權備矣世祖天姿叡哲清明在躬早預經綸知民疾苦思擇令典庶

幾至治德刑並用戡濟艱虞羣兇授首疆隣震懾雖忠厚之化未能及遠恭儉之風足以垂訓若不尙明
察則守文之良主也臨川年長於成王過微於太甲宣帝有周公之親無伊尹之志明辟不復桐宮遂往
欲加之罪其無辭乎高宗爰自在田雅量宏廓登庸御極民歸其厚惠以使下寬以容衆智勇爭奮師出
有名揚旆分麾風行電掃闢土千里奄有淮泗戰勝攻取之勢近古未之有也旣而君侈民勞將驕卒惰
帑藏空竭折屣師徒於是秦人方彊遂窺兵於江上矣李克以爲吳之先亡由乎數戰數勝數戰則民疲
數勝則主驕以驕主御疲民未有不亡者也信哉言乎高宗始以寬大得人終以驕侈致敗文武之業墜
于茲矣後主生深宮之中長婦人之手旣屬邦國殄瘁不知稼穡艱難初懼阨危屢有哀矜之詔後稍安
集復扇淫侈之風賓禮諸公唯寄情於文酒昵近羣小皆委之以衡軸謀謨所及遂無骨鯁之臣權要所
在莫匪侵漁之吏政刑日紊尸素盈朝耽荒爲長夜之飲嬖寵同豔妻之孽危亡弗恤上下相蒙衆叛親
離臨機不寤自投於井冀以苟生視其以此求全抑亦民斯下矣遐觀列辟纂武嗣興其始也皆欲齊明
日月合德天地高視五帝俯協三王然而靡不有初克終蓋寡其故何哉並以中庸之才懷可移之性口
存於仁義心悅於嗜慾仁義利物而道遠嗜欲遂性而便身便身不可久違道違難以固志佞諂之偷承
顏候色因其所好以悅導之若下坂以走丸譬順流而決壅非夫感靈辰象降生明德孰能遺其所樂而

以百姓爲心哉此所以成康文景千載而罕遇矣辛幽厲廢代而不有毒被宗社身嬰戮辱爲天下笑可不痛乎古人有言亡國之主多有才藝考之梁陳及隋信非虛論然則不崇教義之本偏向淫麗之文徒長澆僞之風無救亂亡之禍矣

史臣曰後主昔在儲宮早標令德及南面繼業寔允天人之望矣至於禮樂刑政咸遵典故加以深弘六藝廣闢四門是以待詔之徒爭趨金馬稽古之秀雲集石渠且梯山航海朝貢者往往歲至矣自魏正始晉中朝以來貴臣雖有識治者皆以文學相處罕關庶務朝章大典方參議焉文案簿領咸委小吏浸以成俗迨至于陳後主因循未遑改革故施文慶沈客卿之徒專掌軍國要務姦黯左道以哀刻爲功自取身榮不存國計是以朝經墮廢禍生隣國斯亦運鍾百六鼎玉遷變非唯人事不昌蓋天意然也

陳書卷六

陳書卷六考證

後主紀丁卯立弟叔重爲始興王奉昭烈王祀○重一本作敦南史同

是用甲旦凝慮丙夜損懷○甲應作甲

肄艦艦閱武宴羣臣賦詩○肄各本訛肆今改從南史



陳書卷六考證

[The main body of the page contains multiple vertical columns of text, which are mostly illegible due to fading and the quality of the scan. The text is arranged in a traditional grid format.]

陳書卷七

唐 散 騎 常 侍 姚 思 廉 撰

列傳第一

高祖章皇后 世祖沈皇后 廢帝王皇后 高宗柳皇后 後主沈皇后 張貴妃

周禮王者立后六宮三夫人九嬪二十七世婦八十一御妻以聽天下之內治然受命繼體之主非獨外
門佐也蓋亦有內德助焉漢魏已來六宮之職因襲增置代不同矣高祖承微接亂光膺天祿以朴素自
處故後宮員位多闕世祖天嘉初詔立後宮員數始置貴妃貴嬪貴姬三人以擬古之三夫人又置淑媛
淑儀淑容昭華昭儀昭容脩華脩儀脩容九人以擬古之九嬪又置婕妤容華充華承徽烈榮五人謂之
五職亞於九嬪又置美人才人良人三職其職無員數號為散位世祖性恭儉而嬪嬙多闕高宗後主內
職無所改作今之所綴略備此篇

高祖宣皇后章氏諱要兒吳興烏程人也本姓鈕父景明為章氏所養因改為景明梁代官至散騎侍郎
后母蘇嘗遇道士以小龜遺己光采五色曰三年有徵及期后生而紫光照室因失龜所在少聰慧美容
儀手爪長五寸色並紅白每有葦功之服則一爪先折高祖先娶同郡錢仲方女早卒後乃聘后后嘗書

討能誦詩及楚辭高祖自廣州南征交阯命后與衡陽王昌隨世祖由海道歸于長城侯景之亂高祖下至豫章后爲景所囚景平而高祖爲長城縣公后拜夫人及高祖踐阼永定九年立爲皇后追贈后父景明特進金紫光祿大夫加金章紫綬拜后母蘇安吉縣君二年安吉君卒與后父合葬吳興明年追封后父爲廣德縣侯邑五百戶諡曰溫高祖崩后與中書舍人蔡景歷定計祕不發喪召世祖入纂事在蔡景歷及侯安都傳世祖卽位尊后爲皇太后宮曰慈訓廢帝卽位尊后爲太皇太后光大二年后下令黜廢帝爲臨海王命高宗嗣位太建元年尊后爲皇太后二年三月丙申崩于紫極殿時年六十五遺令喪事所須並從儉約諸有饋奠不得用牲牢其年四月羣臣上諡曰宣太后祔葬萬安陵后親屬無在朝者唯族兄鉅洽官至中散大夫

世祖沈皇后諱妙容吳武康人也父法深梁安前中錄事參軍后年十餘歲以梁大同中歸于世祖高祖之討侯景世祖時在吳興景遣使收世祖及后景平乃獲免高祖踐阼永定元年后爲臨川王妃世祖卽位爲皇后追贈后父法深光祿大夫加金章紫綬封建成縣侯邑五百戶諡曰恭追贈后母高綏安縣君諡曰定廢帝卽位尊后爲皇太后宮曰安德時高宗與僕射到仲舉舍人劉師知等並受遺輔政師知與仲舉恒居禁中參決衆事而高宗爲揚州刺史與左右三百人入居尙書省師知見高宗權重陰忌之

乃矯勅謂高宗曰今四方無事王可還東府經理州務高宗將出而諮議毛喜止之曰今若出外便受制於人譬如曹爽願作富家翁不可得也高宗乃稱疾召師知留之與語使毛喜先入言之於后后曰今伯宗年幼政事並委二郎此非我意喜又言於廢帝帝曰此自師知等所爲非朕意也喜出以報高宗高宗因囚師知自入見后及帝極陳師知之短仍自草敕請畫以師知付廷尉治罪其夜於獄中賜死自是政無大小盡歸高宗后憂悶計無所出乃密賂宦者蔣裕令誘建安人張安國使據郡反冀因此以圖高宗安國事覺並爲高宗所誅時后左右近侍頗知其事后恐連逮黨與並殺之高宗卽位以后爲文皇后陳亡入隋大業初自長安歸于江南頃之卒后兄欽隨世祖征伐以功至貞威將軍安州刺史世祖卽位襲爵建城侯加通直散騎常侍持節會稽等九郡諸軍事明威將軍會稽太守入爲侍中左衛將軍衛尉卿光大中爲尙書右僕射尋遷左僕射欽素無技能奉己而已高宗卽位出爲雲麾將軍義興太守秩中二千石太建元年卒時年六十七贈侍中特進翊左將軍諡曰成子觀嗣頗有學識官至御史中丞廢帝王皇后金紫光祿大夫固之女也天嘉元年爲皇太子妃廢帝卽位立爲皇后廢帝爲臨海王后爲臨海王妃至德中薨后生臨海嗣王至澤至澤以光大元年爲皇太子太建元年襲封臨海嗣王尋爲宣惠將軍置佐史陳亡入長安

高宗柳皇后諱敬言河東解人也曾祖世隆齊侍中司空尚書令貞陽忠武公祖暉有重名於梁代官至
祕書監贈侍中中護軍父偃尙梁武帝女長城公主拜駙馬都尉大寶中爲鄱陽太守卒官后時年九歲
幹理家事有若成人侯景之亂后與弟盼往江陵依梁元帝元帝以長城公主之故待遇甚厚及高宗赴
江陵元帝以后配爲承聖二年后生後主於江陵明年江陵陷高宗遷于關右后與後主俱留纒城天嘉
二年與後主還朝后爲安成王妃高宗卽位立爲皇后后美姿容身長七尺二寸手垂過膝初高宗居鄉
里先娶吳興錢氏女及卽位拜爲貴妃甚有寵后傾心下之每尙方供奉之物其上者皆推於貴妃而已
御其次爲高宗崩始興王叔陵爲亂後主賴后與樂安君吳氏救而獲免事在叔陵傳後主卽位尊后爲
皇太后宮曰弘範當是之時新失淮南之地隋師臨江又國遭大喪後主病瘡不能聽政其誅叔陵供大
行喪事邊境防守及百司衆務雖假以後主之命實皆決之於后後主瘡愈乃歸政焉陳亡入長安大業
十一年薨於東都年八十三葬洛陽之邙山后性謙謹未嘗以宗族爲請雖衣食亦無所分遺弟盼太建
中尙世祖女富陽公主拜駙馬都尉後主卽位以帝舅加散騎常侍盼性愚戇使酒常因醉乘馬入殿門
爲有司所劾坐免官卒於家贈侍中中護軍后從祖弟莊清警有鑒識太建末爲太子洗馬掌東宮管記
後主卽位稍遷至散騎常侍衛尉卿禎明元年轉右衛將軍兼中書舍人領雍州大中正自盼卒後太后

宗屬唯莊爲近兼素有名望由是深被恩遇尋遷度支尙書陳亡入隋爲岐州司馬

後主沈皇后諱藝華儀同三司望蔡貞憲侯君理女也母卽高祖女會稽穆公主主早亡時后尙幼而毀瘠過甚及服畢每至歲時朔望恒獨坐涕泣哀動左右內外咸敬異焉太建三年納爲皇太子妃後主卽位立爲皇后性端靜寡嗜慾聰敏彊記涉獵經史工書翰初後主在東宮而后父君理卒后居憂處於別殿哀毀逾禮後主遇后旣薄而張貴妃寵傾後宮後宮之政並歸之后澹然未嘗有所忌怨而居處儉約衣服無錦繡之飾左右近侍纔百許人唯尋閱圖史誦佛經爲事陳亡與後主俱入長安及後主薨后自爲哀辭文甚酸切隋煬帝每所巡幸恒令從駕及煬帝爲宇文化及所害后自廣陵過江還鄉里不知所終后無子養孫姬子胤爲己子后宗族多有顯官事在君理傳后叔君公自梁元帝敗後常在江陵禎明中與蕭巖蕭巖率衆叛隋歸朝後主擢爲太子詹事君公博學有才辯善談論後主深器之陳亡隋文帝以其叛己命斬于建康

後主張貴妃名麗華兵家女也家貧父兄以織席爲事後主爲太子以選入宮是時龔貴嬪爲良嬖貴妃年十歲爲之給使後主見而說焉因得幸遂有娠生太子深後主卽位拜爲貴妃性聰惠甚被寵遇後主每引貴妃與賓客遊宴貴妃薦諸宮女預焉後宮等咸德之競言貴妃之善由是愛傾後宮又好厭魅之

術假鬼道以惑後主置淫祀於宮中聚諸妖巫使之鼓舞因參訪外事人間有一言一事妃必先知之以
內後主由是益重妃內外宗族多被引用及隋軍陷臺城妃與後主俱入于井隋軍出之晉王廣命斬貴
妃榜於青溪中橋

史臣侍中鄭國公魏徵考覽記書參詳故老云後主初卽位以始興王叔陵之亂被傷臥于承香閣下時
諸姬並不得進唯張貴妃侍焉而柳太后猶居柏梁殿卽皇后之正殿也後主沈皇后素無寵不得侍疾
別居求賢殿正德二年乃於光照殿前起臨春結綺望仙三閣閣高數丈並數十間其窗牖壁帶懸楣欄
檻之類並以沉檀香木爲之又飾以金玉間以珠翠外施珠簾內有寶牀寶帳其服玩之屬瑰奇珍麗近
古所未有每微風暫至香聞數里朝日初照光暎後庭其下積石爲山引水爲池植以奇樹雜以花藥後
主自居臨春閣張貴妃居結綺閣龔孔二貴嬪居望仙閣並複道交相往來又有王李二美人張薛二淑
媛袁昭儀何婕妤江脩容等七人並有寵遞代以遊其上以宮人有文學者袁大捨等爲女學士後主每
引賓客對貴妃等遊宴則使諸貴人及女學士與狎客共賦新詩互相贈答採其尤豔麗者以爲曲詞被
以新聲選宮女有容色者以千百數令習而誦之分部迭進持以相樂其曲有玉樹後庭花臨春樂等大
指所歸皆美張貴妃孔貴嬪之容色也其略曰璧月夜夜滿瓊樹朝新而張貴妃髮長七尺鬢黑如漆

其光可鑒特聰惠有神采進止閑暇容色端麗每瞻視盼睇光采溢目照映左右常於閣上觀粧臨于軒
櫺宮中遙望飄若神仙才辯彊記善候人主顏色是時後主怠於政事百司啟奏並因宦者蔡脫兒李善
度進請後主置張貴妃於膝上共決之李蔡所不能記者貴妃並爲條疏無所遺脫由是益加寵異冠絕
後庭而後宮之家不遵法度有挂於理者但求哀於貴妃貴妃則令李蔡先啟其事而後從容爲言之大
臣有不從者亦因而譖之所言無不聽於是張孔之勢薰灼四方大臣執政亦從風而靡闕宦便佞之徒
內外交結轉相引進賄賂公行賞罰無常綱紀替亂矣

史臣曰詩表關雎之德易著乾坤之基然夫婦之際人道之大倫也若夫作儷天則鸞鸞王化則宣太后
有其懿焉

陳書卷七

陳書卷七考證

高祖宣皇后章氏傳后母蘇○后監本誤後今改正

高祖先娶同郡錢仲方女○方一本作芳

後主沈皇后傳后自廣陵過江還鄉里不知所終○南史自廣陵過江於毗陵天靜寺爲尼名觀音貞觀
中卒與此小異

陳書卷七考證